

東  
華  
續  
錄

東華續錄

咸豐二十三

臣王先謙敬編

臣陶濬宣恭校

五月乙巳朔諭內閣穆騰額諄齡奏委員查辦乍了夷務分別治罪完案一摺此案葛布翁甲等糾約多人在煙袋塘寺院捆縛諸們罕殺斃總倉儲巴及頭目人等搶劫財物私擬斷牌實屬情罪重大業據該大臣等督飭委員將首要各犯拏獲著卽照所擬分別治罪其調用土兵四千三百名亦著分撤歸牧○丙午諭內閣葉名琛奏勦辦東路股匪疊獲勝仗一摺廣東長甯縣山內匪徒嘯聚經該督派兵勦捕兩次殲擒九十名搜緝餘匪二百十五名其江西交界大股匪徒出沒靡常復經該督派委守備任士魁署守備涂得照干總謝清榮等分馳勦捕賊眾敗走該匪復糾集三

千餘人至和平縣之泃頭墟滋擾任士魁涂得照由長布橋進兵先後擊斃賊匪七百餘名生擒二十八名奪獲礮械二百七十餘件該匪竄至瀧下村地方署南雄州孫福謙都司陳綸乘夜冒雨窮追殲斃二百三十二名追獲二十四名署守備李從龍復斃賊三百餘名生擒二十五名各匪藏入村屋我兵槍礮環施燒斃賊匪多名餘匪逃至信豐縣交界地方復經千總楊裕清等邀截擊斃五十名東路股匪經此次痛勦埽除將盡該匪等在廣東江西毗連處所分竄滋擾拒捕戕官實屬罪大惡極見經四路兜勦洵足大挫賊鋒著葉名琛張芾仍各飭所屬文武員弁不分畛域悉數殲擒毋使一名漏網○周天爵呂賢基奏賊初竄浦口不過二三千人沿途裹脅勾結不止倍於正賊見據稟探賊匪竄鳳陽府縣兩城仍踞臨淮並分股竄擾懷遠難保不別懷詭計此時續到

漢中兵五百餘名善祿所帶駐紮永城之兵已到六七百名卽令其暫於宿州南路附近安營與臣呂賢基面商防禦事宜臣周天爵督同舉人臧紆青帶兵由固鎮懷遠等處四面圍剿臣呂賢基已令員外郎孫家泰帶勇二千協同壽春鎮總兵玉山赴鳳陽會剿儻該匪舍臨淮而他竄臣周天爵卽跟蹤進剿並於沿淮上下分撥兵勇擇要堵截惟兵力尙單不敷堵剿查有慧成所轄之西安漢中固原等處官兵計可陸續到宿勢不得不先其所急暫濟然眉況見在鳳陽一帶待援甚急但使淮北一路稍可敷衍仍須分兵李家端藉資防守又奏賊踞臨淮雖屬分股實其精神所專注臣駐兵淮北已據上游見撥兵屯於十里城等處賊自不能沂淮直上所慮賊由裕溪口入巢湖以通餉道並分投接應鳳陽上沂淮河下通洪澤若兩者俱不得手則必全力直趨黃河決計北

上是河北安危形勢不在清江一路而全歸徐宿矣見在安省淮  
北一帶止有臣截畱之客兵與宿遷舉人臧紆青赴援之練勇展  
轉籌思惟有刑部侍郎奕經及奕紀兩人臣知其心地質直當此  
防勦需人請旨飭下奕經等迅赴徐州於黃河南北兩岸嚴查奸  
細督拏土匪與臣等互相應援 上諭軍機大臣等前據李家端  
奏鳳陽失守情形已諭令周天爵等會合進勦並諭托明阿善祿  
等各帶兵前進本日據周天爵等奏督同舉人臧紆青統帶兵勇  
由固鎮懷遠等處圍勦呂賢基亦令隨帶司員孫家泰帶勇二千  
協同總兵王山赴鳳陽會勦此時善祿統帶之兵及陝甘官兵計  
已趕到並著周天爵酌量調遣托明阿想亦帶兵馳抵該處賊黨  
多係土匪乘其大股未來紛竄未定之時著周天爵會同托明阿  
等迅爲布置四面兜勦萬不可任賊他竄到處勾結再滋蔓延見

在賊踞臨淮徐州一帶關繫緊要卽著奕經帶兵前往扼要駐紮嚴查奸細督拏土匪與周天爵等互爲聲援堵賊北犯仍一面防其竄越清江之路周天爵係特派勦賊大員誠懼朕所素知一切調度自能與該侍郎將軍巡撫等籌度緩急相機應變無待朕再三諄諭也奕紀前已有旨交恩華差遣委用矣將此由六百里加緊諭知周天爵呂賢基奕經托明阿李家端並諭令善祿知之○諭張芾奏籌設江防權用停運漕船於小孤山江渚聯泊環以木籓上紮木城多設礮位以資堵禦見因木商裹足難以購辦借用解京額木編造木籓並請飭兩湖督撫酌撥兵弁赴東西梁山等處會同周天爵堵剿等語逆匪嬰城固守大兵攻剿屢獲勝仗其分擾滁州鳳陽之賊已諭令托明阿周天爵等督帶兵勇分投截擊並據張亮基飛飭江忠源帶勇赴皖會剿自不難迅速殲除惟

該逆被勒窮蹙難保不竄回上游自應先事籌防而此時又難紛  
紛徵調重煩兵力著該督撫各就地方情形擇要布置設一旦賊  
匪竄出不能揚帆上泝方爲有備無患又另片奏江省穀多壅積  
部議將倉穀糶變之處實多窒礙難行著張芾隨時體察如糧價  
稍有起色卽行糶變易銀解赴大營應用以濟急需儻米價過賤  
虧折太多自宜權其輕重變通辦理將此由五百里諭知張亮基  
崇綸張芾並諭陳孚恩知之○子廣東陣亡知縣郭邦泰祭葬世  
職○丁未署四川總督慧成翰林院侍讀學士晉康前任江蘇按  
察使查文經奏臣等抵灣頭後於二十四日三更整頓前進直攻  
揚州東門因聞南門忽開恐其潛襲我後卽於二十五日未刻收  
隊回營臣晉康查文經親自督師察看城頭旗幟紛布守城賊隊  
並不忙亂恐其暗有準備非僅虛張聲勢查西北城門久閉僅畱

南門似欲乘機南遁而另股則北擾滁鳳臣慧成奉調西北官兵  
僅到一千九百五十名以之防堵北路兵力實形單弱且東路霍  
家橋仙女廟一帶上可旁趨清淮下可偷渡蘇常均須分撥兵勇  
駐紮然愈分愈單惟有仰懇 皇上俯准飭催前調各兵星速前  
來以資接應儻揚州東北兵力不能厚集他處又復紛紛截畱若  
一有疏失在臣等固不足惜而清淮震撼北竄堪憂矣 上諭軍  
機大臣等前據琦善等奏於四月二十日進攻北門之東城門轟  
塌城垛等情茲據慧成奏抵灣頭後於四月二十四日進攻東門  
逆匪負隅死守並未敘及琦善是否同日會合攻剿該署督與琦  
善共圍一城自應互相知照聲勢聯絡同心合力迅殄賊氛方爲  
不負委任朕以江北諸軍統歸琦善節制又恐賊匪窮蹙乘閒北  
竄復命慧成督兵馳抵淮徐一帶爲大軍應援是慧成統帶之兵



卽係琦善等軍營接應之兵無論江省皖省東西兩路均應隨時偵探擇要調遣防賊北竄今觀所奏不但置滁鳳於不問卽與琦善等軍營聲息亦似絕不相通殊不可解至所稱賊匪似欲南遁而另股則北擾滁鳳復稱東路一帶上可旁趨清淮下可偷渡蘇常究竟見在賊匪欲由何路南遁由何路北竄是否偵探確實如何派撥準備所奏均未明晰該逆以烏合之眾尙能結成死黨日久負嵎大兵徵調不爲不多而統兵者竟似各不相下且但知將續調之兵統歸一路而不顧他路之或有疏虞所謂統籌全局者安在耶見在揚城之賊如何攻克江口之賊如何截斷東路要隘如何設防西路滁鳳一帶賊匪如何急圖剿滅琦善總統諸軍責無旁貸陳金綬勝保均係幫辦軍務慧成經朕特簡督兵爲大軍聲援值此軍情萬分緊急之時朕南望焦憂寢食俱廢尙何暇各

持意見耶該署督此次摺報晉康查文經竟似幫辦軍務慧成尙  
非糊塗無知何遽出此耶總之江皖東西兩路肅清賊匪惟諸臣  
之功儻調度失機致賊北竄亦惟諸臣之罪朕惟知賞功罰罪無  
取空言也將此由六百里加緊各諭令知之○慧成等奏攻擊揚  
州東門逆匪死守情形得旨豈有同是此賊皆攻此城兩軍聲息  
並不相通之理賊雖無大技而匪黨心堅官軍雖盈千累萬而各  
不相下無怪乎我軍勢散難禦飄忽之逆匪也○琦善陳金綬奏  
前因逆賊分股由滁州北竄已嚴飭西凌阿等迅速跟蹤追剿並  
飭浦口六合儀徵等處官兵加意嚴防各路要隘以杜該逆後路  
接應俾竄擾鳳陽股匪黨孤勢蹙易於殲除頃接西凌阿等報稱  
本月二十二日賊匪回竄至滁州十里山岡經西凌阿等督帶官  
兵與賊接仗斃賊數百名賊卽潰亂惟該逆詭譎多端恐仍乘虛

奔突臣等酌量緩急欲賊迅就撲滅先須斷其策應今艇船止二十餘隻加以罟船巡船三板船亦止四十餘隻似不能擊毀無數賊船而臨淮以北直達徐宿靈璧以南固鎮王莊一帶與臨淮較近且當北路之衝臣琦善已飛咨周天爵托明阿督帶兵勇進駐固鎮王莊等處合力迎擊以免賊匪渡河北竄並咨呂賢基李嘉端探明賊蹤隨時就近知會以便兜剿其臨淮以南滁州等處有黑龍江馬隊跟蹤追擊至北岸上游和州亦通大江要路實在無兵可分其浦口六合儀徵等處防堵官兵原杜逆賊接應若一經調動賊必上岸分擾爲害甚烈是北岸防堵之兵尙形單弱萬不可稍有調動而臨淮有河阻隔不能從滁州尾追且迤東可以直達揚州鈔我兵後路又可循洪澤南岸繞赴清江一帶臣琦善已屬勝保酌帶兵勇由天長盱眙斜趨臨淮阻其繞赴揚州清淮之

路卽與托明阿合力痛擊兼可就近督催西凌阿等進剿總期及早殲滅使該逆不敢再萌北竄之心至攻勦揚城自二十一起迄今七晝夜未嘗少息二十二日酉刻該逆從南門突出二三百人意在逃竄經派防南門蔣王廟一帶之侍衛德興阿等帶兵迎擊該逆旋退入城二十三四兩日總兵雙來等復將天甯門一帶城垛轟塌十餘丈轟缺城身數處該逆仍隨時補築抵死抗拒頃探得自江甯駛來賊船一百餘隻在瓜州停泊臣等恐其順流而下必先將江面闌截使賊聲氣隔絕無接濟應援之路然後可望成功再前此黑龍江官兵在浦口遇賊情形雖未能竭力堵禦然以臣細覈情節是西凌阿明慶遇敵在前烏凌額魁福帶兵在後俱與賊接仗屬實嗣逆賊由浦口分股上竄滁鳳臣恐其意圖北竄急商令勝保統帶兵勇馳赴臨淮一帶兜剿惟各路帶兵俱係

大員必待往返函商殊失事機並請旨飭令勝保酌量情形緩急  
無論何項官兵一面咨明臣琦善一面就近飛調以期於事有濟  
得旨勝保既已帶兵馳赴安徽甚妥江南賊船陸續駛來江北顯  
係東西兩路牽掣我軍揚州城必須及早克復以杜彼覬覦之心  
至黑龍江官兵戰敗情形因帶兵官心不齊以致各不相顧勝保  
著准其酌量調撥不必處處札商汝與慧成兩路總得聲息相通  
方能有濟○戊申諭內閣軍機大臣會同理藩院遵旨議覆德勒  
克多爾濟等奏請將哲布尊丹巴呼圖克圖寓館移回原寓處一  
摺哲布尊丹巴呼圖克圖寓館因十餘年來轉生五六世哲布尊  
丹巴呼圖克圖均未長生旋即湮燬該諾們罕等詢問班禪額爾  
德尼據云若由寓館移回原寓處吉祥覆商之四部落盟長意皆  
願從且眾蒙古民人亦皆傾服著照所議即將寓館移回原寓處

居住量呼圖克圖呼畢勒罕移居此處必定吉祥壽命延長諸凡  
順適惟原立寓館處商民築室雜處將來恐致滋事著德勒克多  
爾濟等派委幹員妥爲管理務令取具彼此切實保結以期日久  
相安毋致別滋爭鬪○諭軍機大臣等王懿德奏福建海澄等縣  
會匪聚眾滋事一摺據稱接據署廈防同知王江等稟報風聞漳  
州府屬之海澄縣有小刀會匪千餘人入城攻搶及焚毀衙署奪  
犯戕官之事此外石碼龍溪漳浦平和詔安各廳縣與泉州府屬  
之同安縣亦各有會匪潛伏窺伺欲圖響應並有攻擾廈門之謠  
等情該匪徒夥黨究有若干如何入城攻搶所奪何犯所戕何官  
以及焚毀係何衙署尙未據該管各官詳晰稟報該署督見委文  
武大員帶兵前往查辦著卽嚴飭確查將首要各犯悉數殲擒其  
應如何解散黨與安撫善良之處務當相機籌辦迅速埽除勿令

滋蔓以靖地方將此由四百里諭令知之○向榮許乃釗奏賊勢縱橫皆由江面船多所致屢蒙 皇上訓示火攻之法至再至三無微不至臣等愚見以爲焚燒尤宜散遣四月十八十九等日觀音門外各賊船忽行忽止日凡數變水手無所適從臣等委已革知府陳景曾遊擊蔡應龍及本地紳士前往該處諭以大義給以免死路票並帶官兵接應至二十二日各船戶遂與該逆決裂各將船隻焚燒自寅至午火光不絕燒斃押船長髮賊無數此外各船有由夾江開往大江零星逃散者統計不下一千數百隻遣散水手不下一萬餘人此皆城北觀音門外散遣各船情形也惟是三山石城兩門及江東柵欄等門停泊船隻多逾數倍聞其中尙有該逆輜重防守更嚴恐城北各船解散情事尙未周知或仍聽迫脅駛赴上下游滋擾尤須勦撫兼施見又疊經散給告示儻能

一律散盡該逆江上無船可通則南北之路中斷賊膽愈寒陸路更易得手矣

臣等仰體

皇上好生之德使各省被難船戶人等

不至橫遭焚斃而賊黨從茲解散江面可望肅清至下游艇船共到七十餘隻一遇東北大風即可上駛攻擊至上游礮船之外雖已添設大小木簕惟江水日長江面愈寬若賊船大隊揚帆擁上恐礮船爲數無多尙難抵禦

臣

向榮已疊飭總兵和春俟有順風即統帶艇船二十隻駛至上游與礮船會合防剿不敢因解散已有成效而於攻擊之事稍涉鬆懈也得旨如此辦理甚好攻剿之力不可稍懈慎之慎之○己酉諭軍機大臣等慧成等奏探明賊匪偷挖地道知會琦善等四面攻剿大獲勝仗並酌調後路官兵各摺片逆匪欲挖東北城地道意圖劫營搶礮經慧成等拏獲奸細訊出賊情即速知會琦善等大營俾有準備出賊不意擊斃及



墜河死者不計其數未渡之賊復被我兵追殺無遺其東關之賊亦被慧成等擊斃無算逆匪受此大創技窮勢蹙惟據稱城上大旗旋即藏匿難保不另作詭謀希圖他竄該署督已派兵一千名前赴南門外嚴家窪地方扼賊南竄之路所慮亦尙周密勝保見已統兵往剿滁鳳賊匪琦善陳金綬慧成等務當趁此聲威同心協力督飭各路兵勇四面圍攻剋期收復昨據向榮等奏設法焚燒賊船千餘隻遣散船戶水手約萬餘人若將江面賊船截斷令賊南北不能兼顧則三城更易克復該大臣等仍須互相知照毋失事機至慧成因揚城東北兵力尙單請於續到清江各兵酌量抽撥二三千名此項官兵原爲江北後路策應而設見在滁鳳一帶剿賊亦關緊要除托明阿奕經等所帶各兵外卽著琦善與慧成於續到之吉林等處官兵內酌量調撥扼要布置總期揚城兵

力足資攻剿而滁鳳徐宿之間亦不至稍有疏虞方爲妥善將此  
由六百里加緊各諭令知之○雷以誠奏查清江浦並無城郭又  
非要隘臣在清江時本無一兵一卒卽稽查黃河渡口大權盡在  
河臣不過按日據各屬稟報一次大半具文因聞逆賊竄擾浦口  
六合及滁鳳等處竊計揚州諸軍必有前後莫顧之勢又聞諸軍  
見皆缺餉臣體察事機不敢置身局外是以奏請親赴淮揚各處  
巡查直抵揚州以期聞見確實臣見駐仙女廟距揚城甚近甫募  
之勇教練未熟所以不辭艱險保守裏下河者因募勇籌餉尙有  
可爲不特爲清淮東路門戶且以牽制逆賊北竄之路總期合力  
堵禦以遏兇鋒 上諭賊踞揚州下河一帶地方遼闊自應妥爲  
布置以防賊匪竄逸該副都御史旣稱募勇籌餉尙有可爲卽著  
迅速籌辦仍隨時知照琦善慧成一體嚴防至稽查黃河渡口最

關緊要雷以誠係特派大員豈得任聽各屬一稟了事見在揚州賊勢已蹙難保不分遣匪黨四路窺探著雷以誠一面設法保衛下河地方一面會同楊以增等嚴密巡查河岸如有奸匪偷越立即掩捕毋稍疏虞如河工派委各員查有疏懈貽誤等情即著據實參辦將此由六百里諭令知之○前任湖北布政使唐樹義奏前往湖北幫辦撫輯事宜得旨朕雖未識汝面聞汝官聲素好至湖北時竭力襄辦一切○命已革廣東高州鎮總兵官楊昌泗已革甘肅涼州鎮總兵官楊錄之赴理藩院尙書恩華軍營差遣○庚戌諭內閣據琦善陳金綬勝保奏稱四月三十日寅刻逆匪由天甯門傍暗門突出千餘人偷搭浮橋渡河總兵雙來與都司常萬清帶兵迎剿復從廣儲門北門竄出多賊分股衝突經署參將李英魁守備陳昇楊發參將李致和都司王永各帶官兵分投截

擊琦善帶同遊擊英貴王禮率領存營兵丁前往接應該逆三退  
三進拌死抗拒雙來親執大旗奮力先趨眾弁兵踊躍齊上賊壘  
大潰紛紛回竄擁過浮橋木梁斷折落水淹死無數未及渡河之  
賊均被我兵全行殺斃城上賊匪復被陳金綬勝保用礮轟擊統  
計殲斃淹死者不下三千餘人該逆久困孤城負隅死守此次潛  
出奔突復經官兵痛加勦洗洵足寒賊膽而快人心雙來著先行  
賞給白玉翎管一支以示獎勵仍俟攻克揚城後與受槍傷之參  
將李英魁及出力各員一併保奏該大臣務當乘此聲威迅圖克  
復以慰朕念○諭軍機大臣等據吳必澍奏稱青海扎薩克固山  
貝子格勒克納木札勒於本年正月初三日帶同屬下章京蒙古  
等赴郡領俸辦糧事竣回牧於二月十八日行抵都藍果立烏素  
屯克地方突有番賊百餘人圍搶該貝子受傷殞命章京蒙古等

七名亦被戕害並有帶傷蒙古十三名搶去駝馬一百三十餘隻  
該蒙古等將該貝子屍身搬回柴達木原牧又於二月二十六日  
復有番賊一百五十餘人將該貝子原牧家屬暨屬下蒙古等牲  
畜帳房全行搶去該大臣見在派員前往撫恤嚴緝兇賊等語近  
來番賊猖獗往往拒捕傷官今復將該貝子戕害罪大惡極實堪  
痛恨著舒興阿等迅卽派委將弁嚴密查拏務將戕官搶劫賊犯  
按名弋獲盡法懲治以儆兇頑將此各諭令知之○以湖南零陵  
縣上年秋禾歉收命平糶倉穀○辛亥諭內閣花沙納瑞麟奏遵  
旨查辦一摺此案劉秋貴雖經驗明實係受刑後因病身死並非  
有意消弭惟係特旨交審要犯刑部承審司員未能審出實情致  
該犯倖逃顯戮已屬顛預草率郎中陳魯員外郎馮棡明知該犯  
死於秋審處輒因奉有嚴旨恐干重譴屬令提牢主事志善捏報

日期司獄彰善亦聽屬容隱均屬咎無可辭陳魯馮棡志善彰善均著交部嚴加議處郎中上行走怡昌郎中馮志沂員外郎尙阿布候補主事王金鎔羅寶森堂主事上行走文荃未能覺察檢舉亦屬疏忽均著交部議處尙書周祖培及失察之各該堂官著一併交部分別議處○諭國家設立刑官原以發奸摘伏無論案情輕重均應詳細推求卽犯供狡詐果能虛心研鞫斷無不得真情之理刑部爲刑名總匯凡奉旨特交及咨交各案薈萃紛繁尤當慎重若遇疑難之案或先存成見展轉推卸希圖了事或因犯供未確一味刑求致令自斃轉得倖逃顯戮何以肅法紀而懲奸頑卽如劉秋貴一案攜帶各物逆迹昭然雖堅忍熬刑是邪教之長技如果悉心研究亦何至到案日久竟不能稍得端倪迨至該犯身死之後猶復移改日期冀免嚴譴似此草率掩飾甚非覈實辦

公之道嗣後無論大小案件該部堂官務當督飭承審司員認真訊究既不可有心鍛鍊拖累無辜更不得任意顛預輕脫奸宄總期情真罪當毋枉毋縱用副朕明慎用刑之至意懍之慎之○諭軍機大臣等寄諭理藩院尙書恩華本日據陸應穀奏探聞賊由西路竄擾蒙城該撫已親帶兵勇在商邱一帶防堵該尙書見帶官兵前赴淮徐著卽於沿途確探賊蹤如徐宿緊要卽著督兵前進爲周天爵等後路應援儻該匪全行西竄河南歸德等處情形喫重著卽馳往會同陸應穀督勦務當先其所急毋失事機將此由五百里諭令知之○諭陸應穀奏逆賊竄擾蒙城豫省防堵喫緊一摺據稱賊匪近日裹脅漸多勢甚兇悍該撫已派兵堵截並親帶兵勇前赴商邱扼要駐紮惟兵力甚單已飛咨周天爵善祿併力會勦周天爵此時督帶兵勇馳抵何處善祿想已由永城入

皖著卽探明賊蹤所至迅速督兵截剿趁該匪等奔突無定之時一鼓殲除勿令再行滋蔓臨淮鳳陽見在匪黨盤踞情形如何琦善所派黑龍江馬隊是否能從後追擊絕其來路此股賊竄入皖境爲數本少所稱萬餘人多係裹脅或土匪勾結如能設計解散四路兜拏尙不難於掃蕩切勿稍涉延緩致誤事機前據向榮片奏查獲金陵賊首寄臨淮賊目等僞諭似該匪後路無援專以裹脅爲事其賊目林瀾詳等當卽在蒙城等處著周天爵等偵探確實設法購綫如能將該賊目等拏獲則餘黨勢如瓦解矣原片並僞諭均鈔給閱看將此由六百里加緊各諭令知之○諭陸應穀奏稱賊竄蒙城裹脅萬餘人並有船三四百號若由蒙城西向則商邱鹿邑陳州均屬喫重等語該逆避實擊虛是其慣技自竄鳳陽之後退踞臨淮乃復斜出蒙城裹眾西竄是明知徐宿一帶援



兵踵集又爲此聲東擊西之舉究之逆蹤飄忽本無定算止須合力兜剿萬不至直撲汴梁該撫見擬馳赴商邱之宋家集扼要堵截並先派參將苗樟往亳州以北援應復咨總兵柏山前至陳州一帶適中駐紮著卽相機調度擇要防剿後起未到之兵亦卽飛催前進畱備堵擊仍與周天爵等合力兜截切勿以有用之兵零星分布轉致單弱前據向榮奏查獲金陵城中賊首寄江北僞諭有林鳳詳李開芳吉文元等賊目姓名察其語意著名者止此數人並有不必等候之言是此股賊匪後路無援專以裹脅爲事該撫卽體察確探知會各路絕其裹脅之路則賊勢自孤剿辦當可得手向榮片奏並僞諭均著鈔給閱看昨又據琦善等奏徐州糧臺解餉遲延著該撫飛催鄭敦謹迅卽分路迎提速解軍營毋致貽誤將此由六百里加緊諭令知之○壬子諭內閣王懿德奏漳

泉會匪滋事一摺此次漳泉會匪膽敢恃烏合之眾攻撲衙門竄擾城池並有戕官劫犯重情不法已極業經該署督派令漳州鎮總兵郭仁布鹽法道瑞璜督帶提鎮各標弁兵馳往會同該地方官合力兜圍著卽嚴飭該鎮道等督率文武將首要各犯迅速殲擒毋任竄逸所有該廳縣失守情形及該匪搶劫起數根由是否係地方官辦理不善激成事端著該署督迅卽查明具奏該省向有紅錢關公小刀江湖等會首夥積匪不過數人餘皆隨聲附和或族姓孤單慮遭欺侮或善良富戶希冀保全畏禍入黨並非甘心從賊鄉愚無知實堪憫惻著該署督剴切曉諭除首匪要犯罪不容誅嚴拏懲辦外其餘孱弱老幼致被脅從者查明悉予免罪並傳旨飭令各該府紳民人等團練保衛協同官兵緝捕庶賊匪立就殲除而良善不至擾累也○諭軍機大臣等前據王懿德奏

海澄等縣會匪滋事當降旨令該署督妥速查辦毋令蔓延本日據奏同安廈門均已失守安溪亦被賊進城燬搶請調兵協剿一摺並片奏請解散脅從等語閩省會匪名目不一若地方官隨時訪查認真拏辦何至聚集一萬餘人肆行攻搶連陷城池並有戕官劫犯重情可見因循廢弛養癰已久實堪痛恨見經該署督派委鎮道大員馳往各該處會同防剿著卽嚴飭帶兵員弁迅速掩捕務將首要各犯悉數殲擒其上游之延平等府與下游之漳州等府仍著扼要設防勿致勾結爲患閩省兵力不敷本日已諭令葉名琛等挑備惠潮各鎮協精兵二三千名由潮州赴閩會剿至調往浙江之防兵一千名該省堵禦正當喫緊之際若遽行撤歸恐往返徒延時日而兩省調遣轉致貽誤漳州鎮總兵郭仁布前經向榮奏稱帶兵不能得力見在統兵前往剿辦該員是否足資

策應並著隨時察看勿任貽誤候選知府王朝綸前由京赴臺灣採辦米石著該署督卽傳旨飭令迅赴廈門一帶隨同辦理堵剿事宜其在籍之前任甘肅知府候補道莊俊元兵部員外郎莊志謙等並此外漳泉各屬公正紳士著一併剴切曉諭如能勸諭團練剿匪立功卽由該署督於事竣後覈實保奏候朕施恩另片奏請速撥軍餉已諭戶部速議具奏近來籌餉之難封疆大吏諒已深悉地方設有緩急惟當就近籌畫以應急需若專恃撥款豈不慮展轉遲誤耶已革安徽按察使張熙宇前在閩省緝拏盜案頗有聲威見已諭令周天爵等卽飭該革員迅速赴閩交該署督差遣委用將此由五百里諭令知之○諭本日據王懿德奏閩省土匪滋事同安廈門均已失守請飭廣東省調兵赴援一摺廣東惠潮二府距閩省漳泉較近著葉名琛柏貴迅卽於潮州惠州各鎮

協內抽調精兵二三千名配帶軍火器械派委鎮將大員統領卽由潮州一路取道星速赴閩確探賊蹤協同閩省官兵合力夾攻毋稍延誤將此由五百里諭令知之○諭奕經奏拔營赴援楊以增奏請畱兵清江浦並畱前任漕臣會防各摺片賊匪竄擾懷遠蒙城該處東西兩路與宿亳接壤奕經已帶密雲兵四百餘名趕緊拔營前赴援剿著卽迅速兼程前進與托明阿所帶各兵會合兵力自不至單弱並與周天爵等協力夾擊不必再折回清江徒多往返至清江浦地方爲淮揚後路水陸衝途自宜扼要嚴防著楊以增將見有之山東官兵及本境防兵與所募練勇酌量分撥妥爲防守本日已諭令琦善察度情形兼顧清淮或應分兵協防卽令迅籌辦理琦善總統北路諸軍慧成恩華所帶之兵均歸調遣該河督卽咨商該大臣就近於續調之兵酌撥調度或一面與

李德熟籌彼此互爲聲援呼應可期得力至奕經已帶赴皖之兵自應先其所急毋庸再行撥回五品銜前任漕運總督李湘棻著卽畱於清江與該河督籌商防禦事件署邳州吳棠練勇捕賊如有成效卽飭令該員認真督率辦理毋稍疏懈將此由六百里諭令知之○周天爵呂賢基奏據探四月二十八日經撫臣李嘉端督飭署藩司奎綬及鳳陽府縣各官帶領兵勇收復鳳陽府縣兩城並探得賊從臨淮鳳陽竄至懷遠旋於三十日竄入蒙城又於初一二等日竄至蒙城縣西北五十里之西洋集並探聞該匪欲由亳州直抵汴梁等語臣等查蒙城東北與宿州接壤距州城僅百二十里西北與亳州接壤亦僅二百餘里今該匪聲言欲往亳州雖詭謀多詐未可深信惟蒙亳一水可通一至亳州則與河南之永城商邱鹿邑等縣密邇距山東單縣亦止一二百里不等是

豫東二省不可不嚴加防守

臣

呂賢基卽商令提督善祿帶兵由

宿州西路直抵亳州將該匪痛加剿洗

臣

周天爵分撥兵勇沂渦

河而上追剿並飛咨河南撫

臣

督兵赴亳鹿交界地方迎擊以期

迅滅醜類得旨昨已有寄諭令汝等相機截剿矣今看汝等奏報

情形此股賊匪尙不至謀而後竄果能奮勇殲戮無難掃蕩也○

以吳振械兼署雲貴總督

由雲南巡撫兼署

○癸丑諭內閣本月十五日

夏至

方澤大祀前經降旨朕親詣行禮茲因偶患骭疾尙未全

愈恐登降拜跪未能如常不足以昭誠敬著派恭親王奕訢恭代

行禮○周天爵奏

臣

前聞賊警時卽於渦河邊築戰牆一道並營

壘三座又復請兵募勇三路進攻臨淮孰意四月二十一日賊破

鳳陽二十六日由僻道直趨懷遠搶渡渦河焚掠二十八日賊聞

臣

帶兵在途恐被追及卽於是夜舍舟登陸西走蒙城其尾股之

賊悉被兵勇擒斬無遺惟土匪四面紛起假稱鄉勇入城焚掠甚

於粵匪

臣

於初二日渡河擒獲土匪范三等十餘人盡行正法並

獲粵匪楊棕傳等五人供稱賊之偽東王李姓更有林吉二姓爲

大頭日本欲北竄徐州因宿州有虎勇駐守不敢北來改道由懷

遠西趨蒙亳直走鹿邑而攻汴梁

臣

竊思汴徐爲逆賊北竄要路

皆有處處土匪響應而皖省鳳潁一帶土匪尤多且橫

臣

卽日統

帶兵勇追剿至蒙亳境截其北犯宿徐之路並沿途痛剿土匪杜

其勾結一面分咨陸應穀駐紮鹿邑托明阿帶兵由黃河南岸迅

赴永城琦善速撥黑龍江兵循渦淮兩岸而上以便三路會剿至

臣

呂賢基仍帶同袁甲三駐守宿州並請將過境之陝甘兵暫畱

宿州以資堵禦西安駐防之馬隊酌派五百名交撫

臣

李嘉端在

滁州池河驛一帶駐紮另畱署總兵吉昌帶固原兵駐守懷城緝



拏土匪惟臨淮係通宿徐驛站

臣

既西赴蒙亳則東路空虛亟請

飭下侍郎奕經帶兵迅赴徐邳一帶與李嘉端跨淮而守既可遏

南來之寇更免

臣

東顧之憂又奏據所獲粵匪楊棕傳等供稱正

賊不過千人裹脅雖有兩萬號令實不能行又詢賊無大技不過

驅難民於前敵至八九隊後始是逆匪若以伏兵邀擊於後可以

立盡惟

臣

遠在宿州可以北保徐兗而不能兼顧邳宿專治潁州

土匪而不能兼顧廬鳳自應變通會剿方合機宜李嘉端奏

臣

於

五月初三日接據江浦縣曾勉禮稟稱南岸逆船多隻行至西江

口遇向榮水師礮船暫停北岸旋即揚帆駛過三山江面探馬追

至烏江地方回報逆船已儘數上駛等語復查烏江爲和州東界

其西界則裕溪口

臣

與周天爵呂賢基等屢將此地緊要附摺聲

明止因賊在下游相距尙遠論其緩急自應以防守浦口爲先正

在設法布置而臨淮之賊北竄方待粵兵以資追剿不圖又有此股竄擾江干查粵兵卽日可抵廬郡安慶兵應仍畱守皖城臣擬令粵兵赴巢縣一帶防堵而以咨畱過境之副將沙兆龍統之復調回緝匪之李登洲偕李鴻章各帶練勇前往協剿誠以裕溪爲廬郡門戶卽爲南北咽喉必須於此堵住賊船庶見在北竄之賊不至再添羽翼上諭軍機大臣等前據向榮等奏觀音門外各船探聞與賊起釁卽派官紳前往諭以大義給以免死路票至四月二十二日各船戶遂與該逆決裂各將船隻燒毀此外各船有由夾江開往大江零星逃散者不下一千數百隻遣散水手萬餘人此次揚帆駛過三山江面各船或者卽係向榮等前次遣散之船惟賊情詭譎見在江甯防剿嚴密難保不意圖上竄且更恐乘虛北來冀與見竄懷蒙之賊互爲勾結本日已諭向榮等確切查

探隨時嚴防李嘉端擬令副將沙兆龍統帶粵兵赴巢縣一帶防堵復調回李登洲李鴻章等各帶練勇前往協剿卽著該撫嚴飭該員認真堵截毋任賊匪北竄該撫請畱張熙宇賡音泰德成等差遣著照所請行張熙宇昨已有旨飭令赴閩交王懿德差委此時皖省緊要著暫畱效力俟事竣後再行前往至臨淮賊匪見由懷遠直趨蒙城一帶周天爵卽日統帶兵勇尾追截其北犯宿徐之路並沿途痛剿土匪杜其勾結一面飛咨陸應穀托明阿琦善三路派兵會剿又酌撥陝甘馬步各兵交呂賢基李嘉端吉昌等統帶分駐以資防剿布置尙屬周密此股真賊不過千人其餘多係裹脅沿途逃散不少該侍郎總宜相機設法將真賊悉數殲擒餘匪自易埽蕩並著呂賢基李嘉端嚴密堵截飭屬緝拏土匪勿令勾結爲患所稱拏獲楊悰傳等供稱李姓及林吉二姓爲大頭

目與向榮前奏情形相同著向見獲各犯訊明林淵詳李開芳吉文元等係何處人何時從賊詳細具奏將此由六百里加緊各諭令知之○諭周天爵奏逆匪竄擾懷遠蒙城欲由亳州入豫省見在改道西追一摺據稱尾股之賊多被兵勇擒斬惟土匪四面紛起假稱鄉勇入城焚掠周天爵由懷遠渡河擒獲土匪范三等十餘人匪首王成逃遁並獲長毛粵匪楊棕傳王金等五人供稱賊之僞東王李姓更有林吉二姓爲大頭日本欲北竄徐州因宿州有壯勇駐守改由懷遠西趨蒙亳直走鹿邑擬攻汴梁又片奏據見獲之長髮賊楊棕傳等供正賊不過千人裹脅雖有兩萬餘人沿途逃散極多各等語此股賊匪勢不甚大若得一旅勁兵痛加剿洗則眞賊就戮餘黨立散軍興以來總誤於守而不戰處處設防反致節節落後賊勢日張伊於胡底著陸應穀督飭文武帶兵

星速前進合力兜剿並知會周天爵善祿托明阿奕經江忠源等  
各帶精兵分路剿捕務期迅速殄滅勿誤事機斷不可以防堵爲  
名將有用之兵零星散處轉歸無用也原片鈔給閱看將此由六  
百里加緊諭令知之○諭前據琦善等奏新江口江面有賊船駛  
赴上游本日復據李嘉端奏接據江浦縣曾勉禮稟稱二十七日  
卯刻南岸逆船多隻乘風逆流行至西江口遇水營礮船轟擊暫  
停北岸旋即揚帆駛過三山江面等語前據向榮等奏設法遣散  
船戶水手人等見在上竄船隻是否卽係解散各船被脅難民抑  
係逆匪被剿窮蹙分股由水路潛逃希圖竄擾上游等處著向榮  
等嚴密偵探如係逆匪乘間回竄卽督飭上游礮船極力攻剿並  
飛咨湖北安徽江西各督撫合力夾擊總須彼此聲息迅速相通  
慎勿墮賊奸計若此項船隻實係被脅難民何以水營礮船又復

韓擊且琦善李嘉端兩處亦未據稱向榮等知照情節甚屬可疑著一併確查迅速具奏將此由六百里加緊諭令知之○諭據駱秉章奏江西上猶縣鵝形山等處有匪首劉洪義聚眾在桂東縣地方滋擾將把總呂志漳戕害嗣據永州各屬兵役拏獲唐潮漢等供稱有郴州人劉清平聲言廣東火燒山賊匪欲分股滋擾又廣東陽山縣各屬均有土匪數百肆搶該處與宜章臨武等縣接壤亟宜嚴防會勘四月十三日沙田墟溪源等處有賊匪三千餘人肆行搶劫經該署縣會營協剿斃賊六十餘名該匪分五股衝突兵勇紳士受傷甚多該署撫已飭派參將玉山候補知州張榮組署鹽法道夏廷樾帶兵前往相機剿辦該處與江西廣東壤地毗連本日已諭令葉名琛柏貴張芾派兵會合兜剿仍著張亮基駱秉章迅卽督飭文武員弁設法剿捕如必須大員督辦卽著提

督鮑起豹親往督率將弁將首要各犯迅速殲擒毋得稍畱餘孽將此由五百里諭令知之○諭駱秉章奏江西上猶縣匪首劉洪義聚眾在桂東縣地方滋擾廣東連州火燒山及陽山縣戊壬坑星子境屬之潭源洞均有匪徒屯聚該處與宜章臨武等縣接壤亟宜加意嚴防等語土匪糾眾肆擾必當及早撲滅方免蔓延貽誤已據駱秉章選派員弁分帶兵勇前往堵拏惟該處係三省交界難保不此擎彼竄著葉名琛柏貴張芾遴委幹員合力兜拏並將該匪等巢穴先行擣毀俾賊匪回竄無路自不難迅速殲除也將此由五百里各諭令知之○暫停齊齊哈爾黑龍江墨爾根呼蘭四城輓運米石○甲寅諭內閣張亮基崇綸奏勦辦廣濟匪徒連獲勝仗一摺另片奏掩擒匪黨躡緝逸犯等語湖北廣濟縣匪徒抗糧戕官經臬司江忠源於前赴江南軍營之便先行率兵勦

捕並經署提督阿勒經阿署漢黃德道徐豐玉前往會剿四月二十三四等日疊次接仗獲勝斃賊五百餘名生擒數十名二十七日遴委員弁帶勇跟追復捕賊十七名餘匪迫入湖汊溺斃無數該匪大受懲創勢窮力蹙經江忠源等傳示賊巢廣爲曉諭被脅愚民解散甚多此後辦理較易該臬司見已啟程由九江赴皖會剿著卽責成署提督阿勒經阿署漢黃德道徐豐玉督飭兵勇迅速搜捕務將首要各犯悉數擒獲盡法懲治勿任一名漏網○諭西凌阿等奏陳軍械馬匹糧餉情形一摺西凌阿以都統大員統帶黑龍江官兵經琦善派令與明慶烏凌額魁福駐紮浦口防剿逆匪是其專責乃於賊船竄擾之時並不能督兵奮力攻擊輒行退回並將鍋帳遺棄可見西凌阿等漫無準備爲賊所襲前據琦善參奏當經降旨暫行革職仍責令戴罪剿賊以觀後效該革員



等於奉到嚴旨後應如何悚懼感奮稍贖前愆乃以軍械馬匹糧餉不足曉曉置辨藉以掩其敗走之罪且所稱與賊接仗及追剿情形支離掩飾情狀顯然近來帶兵大員賊來不擊賊去不追幾成錮習猶復於賊退之後藉詞諉過他人昧良取巧實堪痛恨若不嚴行查辦懲一儆百何以肅軍律而服人心西凌阿等摺著發交琦善按照所陳逐一詳查如係飾詞卸罪卽著按律定擬具奏候旨懲辦見在江北各路大兵雲集曾經降旨統歸琦善節制悉聽調遣帶兵各員於軍情緩急自應就近咨呈欽差大臣酌量覈辦事權既可歸一亦不至有貽誤若以空言異議動發急遞或被參之後希圖飾辨挾制此等巧偽惡習豈能逃朕洞鑒耶懷之愼之○向榮許乃釗奏臣等自四月二十二日遣散觀音門外被脅各船仍一面檄調下游艇船二十號駛赴上游幫同礮船堵禦以

壯聲勢茲據都司楊煥章等稟稱二十七日東北風起忽見夾江  
大江有船數十號揚帆直上當經我軍礮船擊壞多隻餘皆逃回  
隨又續到百餘號見我兵船開礮均卽落帆搖手挨近北岸午刻  
以後風勢愈大又有船千餘號鳴鑼揚帆蠶擁直前迨三十日賊  
船由當塗駛至蕪湖礮船遂分十餘隻駐守蕪湖江口防其竄擾  
臣等先慮賊船上竄者一爲駛往太平府北岸直趨蕪湖與鳳陽  
股匪會合滋擾一爲竄踞太平府城西岸或從蕪湖徑赴甯國阻  
截糧道窺伺糧臺或旁趨東壩竄擾蘇杭等處是以二十八日先  
派已革提督福興帶兵二千名二十九日續派參將孔廣順帶兵  
勇各一千名星夜馳赴太平蕪湖一帶進剿與前派守護糧臺及  
駐紮東壩各兵勇互爲聲援一面飛咨琦善等及安徽撫臣李嘉  
端一體防範今據報賊船已越太平蕪湖而上未知是何詭謀惟

思賊與難民總以有無焚掠爲斷今訪之沿江居民皆無焚掠等事或係脅從思散亦未可知見當克復金陵十分喫緊之際此等上駛賊船未知所往未便以精銳將士徒事窮追轉致大營兵單且金陵爲首逆負固之地拔其根本則枝葉自然萎謝臣等見已飭各營置備攻具簡選精銳一有可乘之機卽當迅速克復不敢稍有遷延張亮基崇綸奏據探稱金陵城內賊匪多溷難民薙髮而出是其窮蹙思散確有可信見在金陵揚州鎮江三處均有大兵駐紮賊必不敢於兵多之處拌死狂竄惟浦口係北竄要道東壩係南竄要道東西梁山係由江上竄要道儻三處守禦空虚恐逆賊由此兔脫又成不了之局江忠源見由九江前進伏乞指授機宜如臨淮一帶賊已就誅或無關緊要卽請飭下該臬司擇要駐紮輔以重兵遏賊分竄尤爲得力並請旨通飭帶兵將官講求

結營築壘之法使士卒有所憑藉可以與賊相持楊文定奏總兵陳世忠周士法統帶浙江師船二十隻先後駛至焦山經臣與浙江藩司麟桂總兵和春等議乘風順將艇船進據鮎魚套金山一帶斷賊瓜鎮往來之路浙師堵住焦山遏賊順流東竄之路迨二十八日東北風作頗稱順利乃和春麟桂忽奉向榮札文恐賊匪回竄飭調和春親帶戰船二十隻前赴金陵免兒磯地方堵擊和春遵札卽欲調船前往臣亦有進克瓜州分撥師船直趨金陵之奏惟見在瓜州賊船增多鎮江未復其艇船水勇均係雇募原與兵丁不同聞欲調赴金陵俱以四面受敵爲慮不肯前行麟桂隨於二十九日親赴向榮大營稟商應俟議定再行分撥是日卯刻風轉東南其勢甚大臣以風色不可多得無論應調何船必先乘時進剿隨差弁前往促戰和春卽會商周士法陳世忠等進攻瓜

州時提臣鄧紹良亦由梁山出隊各船卽起碇揚帆上駛由甘露寺至大馬頭一帶皆有賊營開礮迎敵各艇師直前近岸連照賊營開放槍礮該逆見我師且攻且進將瓜州口外排列多船收入口內我師從已至申轉戰四時之久統計焚溺賊船三十餘隻奪獲五隻生擒賊匪九名擊斃一百餘名時因天晚北岸亦無兵勇接應隨時撤船於金山上游停泊截斷江面使瓜鎮賊匪聲息隔斷再行設法攻取但此處深入賊境深爲可慮除飭各艇船嚴密防範並嗣後分船進攻仍撥回師船十餘隻往泊焦山上游相爲援應上諭軍機大臣等向榮等奏被脅賊船乘風上駛並無焚掠情事一摺昨據李嘉端奏江南賊船乘風駛過三山江面當諭令向榮等查明是否卽係遣散船隻本日據奏自二十七日至三十日先後有賊船千餘隻由金陵駛過蕪湖並未焚掠其船中或

六七人或二三人有已薙髮者有未薙髮者均未包紮紅巾及穿號衣詢之船上逃出難民據稱兩湖賊目皆言粵匪不公不如仍順聖朝雖強受僞職念切思歸今見賊首勢衰因紿楊逆回攻長沙兼擾南昌分我官兵之勢實欲爲星散潛逃地步本日復據張亮基等奏探據金陵城內賊匪多溷難民薙髮而出冒充官兵又龍潭地方有船百餘隻稱係難民然貲財甚富已委員往查各等情所聞各有異同或真係脅從思散或竟別有詭謀皆不可知已由該大臣飛咨上游各督撫設法防堵嚴查諒已一體防範此等裹脅之眾並非甘心從逆地方官若能相機解散曉以大義遣令回籍各營生理卽是化莠爲良之法儻操縱失宜偵探不確或妄拏無辜難民轉任真賊漏網必致別生事端反墮奸計此中機宜諒該大臣督撫等必能豫爲籌及也本日據楊文定奏水師復獲

勝仗進據金山俾瓜鎮賊匪聲息隔絕辦理尙屬得手鄧紹良等業經移營逼近鎮城該大臣等務當趁此機會迅速督飭水陸各營將弁合力勦擊並設法杜賊勾結斷其往來之路則賊勢益孤兵威益壯自可指日克復也將此由六百里加緊各諭令知之○諭本日據李嘉端奏已將鳳陽收復定遠土匪亦擒獲多名惟該逆北竄之路在在均宜嚴防等語見在呂賢基駐守宿州周天爵馳赴懷遠一帶跟蹤追剿李嘉端即可統帶兵勇相機堵剿仍知照奕經托明阿陸應穀四面兜拏互爲應援本日又據向榮奏被脅賊船乘風上駛並無沿途搶掠之事賊情詭譎不可不防著該撫飭令地方文武一體嚴防勿使與竄擾懷蒙之賊暗相勾結將此由六百里加緊諭令知之○惇郡王奕誼奏太監曹鳳林受責身死自請議處得旨奕誼著交宗人府議處尋議罰俸二年從之

○以鳳陽府城被賊竄陷革知府裕恭知縣黃元吉職予陣亡主簿張士林祭葬世職○乙卯 皇貴太妃慈壽節 上詣 壽康宮行慶賀禮○諭內閣裕瑞等奏請校閱駐防官員槍礮等語槍礮爲行軍利器與馬步箭並重成都駐防各官向來僅練弓箭不習槍礮卽有由鳥槍出身者日久亦就生疏嗣後該將軍等於春秋兩操及隨時考驗均著兼閱槍礮俾駐防官員嫻習火器以資教練而重操防○丙辰陸應穀奏臣於初五日據探賊於初四日竄至亳州州城失守難民紛紛逃出見在大兵陸續趕到宋集臣亦卽日馳赴宋集以便進剿查亳州失守河南門戶已失自須厚集兵力一鼓克復方能保全豫省大局惟臣所帶兵勇不過三千餘名誠恐眾寡不敵致滋他虞查見在調赴皖省之兵由歸德前進者尙有漢中兵九百八十名宜君營兵六百五十名甯夏馬隊



五百名尙在永城宿州之間此時賊全股趨豫臨淮情形稍寬豫省防堵萬分緊要臣已飛檄調赴宋集以爲進剿之用並請飭下周天爵善祿星夜速帶兵勇赴亳會剿又奏臣駐紮宋集初六日早探報亳州逆匪陸續出城臣飛飭副將錫普常阿等整隊迎截在升家樓遇賊前隊該副將等督兵分爲兩翼施放連環槍礮該逆相持兩時臣聞前隊開仗卽令都司常啟雲督同梁澍業舒長山姜麓各帶兵勇分爲三路嚴陣以待初七日賊匪撲營當飭該兵勇等施放槍礮殲斃生擒百數十名又續據錫普常阿等稟報本日辰刻復有逆匪三千餘名分竄歸德當卽出兵邀擊我兵戰至一時有餘該匪力不能支斃賊六百餘名生擒大頭目杜汶學張泳祐周夢蘭周鍾義四名正法惟探有大股已由柘城之胡相城直竄汴梁情形緊急飛調錫普常阿等迅速折回臣卽督同相

機堵截並調永城駐紮之兵折回歸德以防東竄請飭下直隸山東督撫臣一體嚴防見在直隸藩司張集馨駐紮臨洺關伏祈飭

令該司將所帶兵弁馳赴豫省黃河北岸以爲聲援 上諭軍機

大臣等本日據陸應穀奏亳州失守已帶兵進剿又據奏剿匪獲勝賊竄汴梁各一摺見雖連獲勝仗而大股賊匪竟由柘城直撲汴梁已成滋蔓之局覽奏曷勝憤懣本日已諭令托明阿奕經善祿江忠源迅速督兵赴援並令恩華帶兵趕赴該省救應直隸山東兩省亦令一體嚴防矣見在河南情形緊急該撫已調錫普常阿等迅速折回督同堵截並調永城駐紮之兵折回歸德以防賊匪東竄之路一切調度自應相機辦理此股半係裹脅之眾且後路無援各路官兵必可迅速趕到務當會同夾擊剋期殲滅勿令再有蔓延張集馨見駐臨洺關已諭訥爾經額轉飭該藩司赴黃

河北岸惟防守直隸要隘亦關緊要張集馨能否前往尙難豫定該撫責在守土當此萬分喫緊之時總當力籌防勦保全大局慎勿專待援兵致誤事機將此由六百里加緊諭令知之○諭寄諭欽差大臣琦善幫辦軍務陳金綬勝保四川總督慧成據陸應穀奏賊由柘城直竄汴梁又據陳啟邁奏拏獲奸細據供賊目遣令探聽徐州虛實欲由亳州前撲汴梁儻汴梁不能得手卽由黃河下竄清江等語賊匪竄出浦口不過二三千人又經六合官兵擊敗人數愈少如果西凌阿等認真堵截何至裹脅蔓延深入皖境見聞欲撲汴梁若再逼近黃河豫省兵單愈難堵禦朕每披警報焦灼萬分該大臣統領江北諸軍自應統籌全局乃近日奏報揚州接仗情形仍未能克復郡城累月經旬頓兵堅城之下坐使分股餘匪任意衝突由皖而豫所謂調度者安在慧成督兵前赴揚

州見在如何與琦善等籌畫克復之策若再日久相持必致顧此失彼未知該大臣等計將安出勝保帶兵赴皖是否業已啟程係由何路進剿此時賊情緊急萬不可再有濡滯致誤事機將此由六百里加緊各諭令知之○諭河南省城濱臨大河沿河考城等處與直隸之東明長垣接界迤北之武安等處亦與直隸之邯鄲磁州一帶壤地相連直隸爲畿疆重地亟應嚴密設防且爲豫省後路聲援著訥爾經額體察情形何處緊要卽於何處撥兵防堵如須親自出省卽著迅速奏明前往駐紮陸應穀奏請飭張集馨馳赴豫省黃河北岸之處亦著該督酌量辦理若該司出境能與豫省聲勢聯絡則嚴扼黃河亦足以保衛直隸毋得稍存畛域致誤事機將此由四百里諭令知之○諭前因訥爾經額奏察哈爾馬匹於江南水土未習請停止調往軍營當降旨諭令辦理糧臺

之藩司陳啟邁等於河南山東等處就近購買毋誤軍行茲據陳啟邁等奏稱河南山東等處素非產馬之區一時難以購辦請於直隸山西兩省額設營馬內共調五千匹解赴軍營等語軍營急需馬匹既難購買山東河南防剿喫緊亦難抽調自應於就近直隸山西等省酌量撥用著訥爾經額哈芬於接奉此旨後迅卽調選臚壯營馬直隸三千匹山西二千匹委員星速解赴江南徐州糧臺以應急需該督等務卽遵旨妥辦不必再行請旨以免遲延至各該省應補馬匹亦關緊要或卽以察哈爾捐備之馬挑選臚壯者照數撥補或由各該省購買若干匹補足額數著該督撫等自行籌酌辦理可也原摺著鈔給閱看將此諭知訥爾經額並由五百里諭令哈芬知之○諭王懿德奏據報漳州鎮道被賊戕害永安沙縣先後失守一摺覽奏曷勝焦急該省會匪雖時有蠢動

半係烏合何至府縣城池連次失陷該省地方官毫無準備實堪痛恨廈門距省不過六百里永安沙縣亦在五百里以內該署督兩次奏報均據探稟之詞並無確實見聞朕久聞該省驛站廢弛卽此已可概見究竟漳州府城是否失陷該管鎮道如何被戕永安沙縣各文武如何下落卽著迅速查明具奏閩省除水師外陸路兵額四萬有餘爲數不少泉州駐兵尤多何至一聞警報卽須調兵鄰省見在江西浙江皆當防堵之際兵力恐亦難分該署督所請飭調兩省官兵已諭令張芾黃宗漢酌量調撥但恐緩不濟急該署督仍當與提督炳文會商就本省所有之兵迅速調撥勦辦萬不可坐待援兵致滋延蔓炳文是否已赴永安沙縣等處勦捕賊匪該署督應統兵前往何處督勦均著迅速籌辦勿誤事機本日據御史蔡徵藩奏勦捕匪徒全恃紳士練勇無須大費兵力

等語朕前曾降諭旨飭令莊俊元莊志謙王朝綸等勸諭團練原以地方紳士之力保衛鄉閭該署督等如果撫馭得宜自可收指臂之效卽如該署督所奏同安縣民克復城池漳州義民攻殺賊匪數千可見民心足恃卽著剴切曉諭認真籌辦至該御史奏請暫停採買臺米一摺並著該署督體察情形奏明辦理原摺片著鈔給閱看將此由六百里諭令知之尋奏招商運米赴津此時未便舉行合如該御史所奏暫行停緩從之○諭前據王懿德奏會匪疊陷廈門同安安溪本日又據奏收復同安安溪查探漳州府城被擾鎮道聞俱被戕延平府屬之永安沙縣先後失守請調江西浙江官民各二千名會剿各摺浙江見在籌防江南賊匪喫緊之際江西嚴防賊踪回竄並湖南廣東各土匪亦關緊要兵力自難多分惟閩省與江西浙江地界毗連專守本境不如協剿鄰疆

庶期早淨賊氛則本省之藩籬自固著黃宗漢張芾酌度情形迅調官兵派委鎮將大員相機赴援仍嚴密防守毋任賊匪竄入將此由五百里各諭令知之○丁巳諭內閣張芾奏應行發遣之員捐銀贖罪等語已革總督程喬采所犯情節較重著仍遵前旨卽行發遣其族房程青藻等代捐軍需懇免發往新疆之處著不准行○代理河南布政使沈兆澐河南按察使林揚祖奏臣等初十日辰刻接撫臣陸應穀來函知在商邱宋家集與賊接仗得勝不意賊由閒道潛至歸德府城失守卽帶兵徑赴劉家口而賊已先派萬人進駐該處中途折回至歸德城外接戰一晝夜不能得力已刻馳至柘城聞賊分二股一走劉家口一趨汴省屬臣等嚴爲豫備汴省城大兵單城中僅有撫標及城守尉兵一千餘名鄉紳團練壯勇一千五百名如賊匪猝至難資抵禦請旨速調直隸官



兵來豫應援臣等嬰城固守以待援兵合集再圖迅掃妖氛再臣等因撫臣陸應穀見在柘城恐道路阻隔文報不通理合繕摺由驛馳奏 上諭軍機大臣等本日已諭令勝保帶兵直赴豫省復據托明阿奏親督官兵馳往會剿奕經善祿等不日均可趕到陸應穀見在柘城是否爲賊梗阻著卽與托明阿等合力夾擊據稱賊匪無能又云賊紀律嚴人數多我兵見賊易潰等語近來軍營習氣卽患在紀律不嚴遇賊輒避守土之官但望調兵救援不能竭力防守賊匪未到城中官民先已搬移似此情形卽有援兵亦復何益歸德郡城設防多日何以一時遽爾失守必應嚴參按律懲辦至河南省城民心最爲固結前次祥符大工卽賴該處紳民登城守護得保無虞見在省城兵力單薄卽著沈兆雲林揚祖等督率地方文武剴切勸諭該省紳民團練鄉勇合力守禦以待援

兵並隨時嚴查奸細無令滙入致有疏虞江忠源由廣濟赴皖已諭令探明賊蹤改道赴豫該撫卽飛催前進協剿可也將此由六百里加緊諭知陸應穀並傳諭沈兆澐林揚祖知之○諭據代理河南布政使沈兆澐等奏歸德失守見在賊分兩股一走劉家口一趨汴梁等語已飛飭各路帶兵大員星速前往豫省援剿矣豫省四通八達無險可扼山西與該省壤地毗連亦應豫防該匪分股奔竄著哈芬妥籌布置派委得力員弁前往要隘處所嚴密防堵毋稍疏虞此股匪徒多係烏合之眾該署撫若能認真堵截自不至闖入晉境也將此由五百里諭令知之○諭本日據沈兆澐等奏歸德府城於本月初十日失守賊分兩股一趨劉家口一趨汴梁見在河南防剿萬分緊急著勝保卽帶赴皖之兵星速兼程馳赴河南探明賊在何處卽由何路進剿不可稍有濡滯致失事

機將此由六百里加緊諭令知之○諭本日據戶部奏兵餉支絀請飭附近籌款移緩就急一摺見在寶泉局雖經復卯兼鑄大錢尙有不敷備支之勢著訥爾經額速飭藩司於沿河州縣起運各款內酌提錢文舟運至京並派大員催提毋任延宕並著長蘆鹽政文謙卽將本年鹽課按照時價全數改解制錢或覈明銀款先行酌解若干原摺著鈔給閱看將此由四百里諭知訥爾經額並傳諭文謙知之○命劉源灝來京以崇恩爲山東布政使由哈密辦事大遷○戊午諭內閣前有旨將賽尙阿徐廣縉按律定爲斬監候秋後處決因思賊匪見已由安徽竄入豫省各路帶兵大員奉命徵調星速赴剿而該革員等以失律羈囚置身事外值此軍務緊急豈容安坐待斃耶賽尙阿著發往直隸交訥爾經額差遣委用徐廣縉著發往河南交陸應穀差遣委用均責令戴罪自效該員等

具有天良宜如何感愧力圖報效儻再不知奮勉或有貽誤朕惟  
有執法從事決不寬貸○諭刑部奏定擬揚州失守官員罪名一  
摺已革漕運總督楊殿邦已革前任鹽運使但明倫均著照部議  
從重發往新疆充當苦差仍令暫畱清江浦隨同楊以增等辦理  
防堵戴罪自效○琦善慧成陳金綬勝保奏揚城西面一門由臣  
陳金綬臣勝保督兵進剿北面係臣琦善帶兵攻打東面係臣慧  
成帶兵督防其南門外有運河一道直通三汊河下達瓜州臣琦  
善俱派兵嚴防惟瓜州口江面遼闊不能阻截因之賊船得以開  
入既未能杜其江面之往來卽難辨爲何處之竄匪而揚州在六  
合儀徵之下距浦口一百八十餘里江岸地居上游則與浦口對  
峙臣琦善恐浦口空虛南岸賊船時時潛登北岸防範益加嚴緊  
雖揚州賊匪亦有從舊南門潛出窺探者但一經官兵截擊仍卽

退縮入城並無由旱路分股竄出之事臣琦善等自四月二十日起攻打揚城七晝夜未嘗閒斷均經先後奏明臣慧成所奏二十四日進攻東門正臣琦善會攻西北兩路之際臣琦善於攻打時一經知會臣慧成卽派官兵赴東門合剿查看揚城賊匪負固守拒並無竄意自四月三十日至五月初一日我兵連次剿殺該逆日夜修補城垛守禦益密至各州縣稟報賊情僅憑差探傳聞異詞本非目覩況賊匪詭譎多端往往徧遣奸細布散訛言搖惑眾聽稍不審慎鮮不被其所紿雷以誠所奏或亦得諸傳聞臣勝保見與西凌阿等前往臨淮一帶會剿其鳳陽股匪分竄懷遠蒙城業經周天爵督帶兵勇馳往剿擊臣琦善於賊匪由滁州分竄時卽經飛咨河南山東各撫臣豫爲防範並咨行帶兵各員跟蹤追剿杜賊北竄恩華奏臣於五月十一日行抵東阿縣途次接據荷

澤縣稟報逆匪於曹河上游搶得大船數隻撲過北岸兵力單薄  
恐難抵禦等情伏查兗州係東省水陸衝途距濟甯州甚近賊匪  
既於曹河上游搶渡濟甯兗州實當衝要至直隸大名一帶更宜  
嚴防所有前調各兵臣見已飛飭星夜前進迅速赴兗並移咨琦  
善李德各星速派兵赴兗以資援應 上諭軍機大臣等琦善等  
奏鳳陽股匪係由江面登岸並保舉出力人員各摺片此股賊匪  
見已由安徽竄擾河南歸德失守又分二股一赴汴梁一趨劉家  
口本日復據恩華奏逆匪於曹河上游搶撲北岸兵力單弱恐難  
抵禦等情覽奏殊深憤懣琦善向榮等統領大兵分駐大江南北  
原期防剿兼施一面進攻一面防賊分竄乃頓兵城下幾及三月  
至今一城未能克復又任賊由浦口北竄皖省既竄之後西淩阿  
等又不能迅速追剿以致賊勢日肆猖狂見在汴梁省城十分緊

急卽山東直隸一帶處處堪虞所有各省官兵均先後調赴該大  
臣等軍營此時北省徵調緩不濟急幾於無兵可調無款可籌朕  
日夜焦思寢饋難安琦善向榮等身爲統帥何以通籌全局爲朕  
分憂耶儻將金陵鎮江揚州剋期收復則北竄之賊自必聞風膽  
落該大臣等亦可分兵北來遏其肆竄之路見聞勝保已赴河南  
托明阿等亦計日可到歸德赴汴之賊冀可殲除其由劉家口渡  
河股匪僅有恩華李德等抵禦兵力尙單已命慧成馳往河北會  
同勦捕揚州城東卽著福濟帶兵防堵毋令空虛琦善等保舉出  
力人員既有勞績自應甄敘惟值此賊勢緊急朕實難降諭旨卽  
受恩各員亦難自安除所保之高槍長雙興等十四名千總李長  
春等一百二員名並勝保軍營之千總聞樹棠民勇鍾玉龍陳德  
魁李平均照所請卽行獎賞外其餘單開各員並另片所保雙來

武慶二員均著存記俟克復揚州後定當一併論功從優獎勵見  
在北省防勦緊要著向榮卽飭瞿騰龍酌帶兵勇馳往河南山東  
一帶確探賊蹤協力攻勦毋稍遲誤將此由六百里加緊各諭令  
知之○諭本日據恩華馳奏賊匪於曹河上游搶船撲過北岸見  
催各路官兵前往堵勦等語已諭令恩華統帶官兵迅往迎擊堵  
賊北竄之路該處兵力尙單恐難抵禦著慧成酌帶官兵星速折  
回東境由河南北岸探明賊蹤迎頭截擊俾賊匪不能深入東境  
其灣頭酌畱兵弁著卽交福濟統帶督同查文經防勦毋致疏虞  
將此由六百里加緊各諭令知之○諭周天爵等奏探明賊竄歸  
德卽日前往赴援一摺此股賊匪係由鳳陽竄擾而西當其由臨  
淮入鳳郡時若能督飭兵勇迅速堵截何至任其奔竄擾及豫省  
乃於賊擾亳州之後又成尾追之勢周天爵素稱勇敢所保臧紆



青練勇可當一面獨不能與賊決一死戰痛加勦洗耶著卽督帶兵勇兼程馳赴歸德一帶併力攻勦毋稍延緩賊勢甚屬飄忽然烏合之眾一經痛勦勢亦易散若不乘其紛竄未定及早撲滅燎原之火何所底止該侍郎其何以慰朕耶臨淮徐宿各路已截畱善祿所帶勇五百名以爲聲援蒙城土匪業已委員前往彈壓諒不至別生事端呂賢基等當嚴防妥辦勿稍疏忽將此由六百里加緊諭令知之○諭陸應穀恩華等奏逆匪竄入河南欲撲汴梁並分股由曹河上游渡河入山東交界等語見在賊勢紛竄各路大兵多在淮徐一帶河南山東兵力旣形單弱而直隸與該二省處處毗連防堵尤關緊要陝甘兵徵調已多但因附近河南應援較便著舒興阿張祥河於各標營內就近酌量抽撥精兵四五千名配齊軍裝器械揀派得力將弁由河南一帶分起前進探明賊

蹤相機進剿如山東直隸地方情形喫重卽著北行追剿毋稍遲誤其潼關等處爲入陝門戶並著實力嚴防以杜賊匪窺伺見在軍餉最關緊要不能不借資捐輸惟山陝兩省尙可濟急著該督撫速飭地方官會同紳士等籌辦以備撥用俟捐有成數卽行奏請優獎想該士民等志切同仇定必竭力輸將以期迅殄逆氛共享樂利也將此由六百里加緊諭令知之○諭前因逆匪竄擾江南疊次諭令李德嚴防黃河渡口將船隻收入北岸茲據恩華奏稱逆匪由皖竄豫於曹河上游擄船偷渡等語若使該處防守嚴密何至任賊偷渡所謂防河者安在耶見在東省兵力空虛李德聞得此信諒必帶兵擇要堵截茲已諭令恩華帶兵前往迎剿又命慧成由黃河北岸截擊勿令該匪深入東境著李德速卽籌畫機宜嚴飭地方文武員弁加意防範並將各渡口船隻盡行收至

北岸毋得再資賊用將此由六百里加緊諭令知之○諭據陸應穀恩華等奏賊匪竄擾河南山東見在直隸防堵甚爲喫緊該省官兵調赴軍營者一時難以撤回著哈芬迅卽揀選精兵三千名酌帶軍裝器械派委得力將弁管帶馳赴直隸交訥爾經額調遣毋稍遲誤前調山西營馬二千匹赴徐州糧臺備用著卽迅速前進再前因軍餉緊急諭陝西山西等省委速勸捐見在大兵雲集需餉孔急庫款不敷籌撥山西省前次捐輸頗稱踴躍雖係紳民出力亦由該地方官勸諭始能迅速集事此次朕命京員保舉紳士原爲幫同地方官辦理更可得力並非令地方官藉詞諉卸也哈芬到任辦理尙屬認真著卽速飭地方官會同紳士等設法勸導如捐有成數卽行奏請從優獎勵務使輸將踴躍源源接濟急需賊勢由南而北勢雖蔓延聞多係裹脅之徒若能及早痛剿不

難撲滅河南爲北省扼要之區肅清豫境正所以保衛京畿想各

士民志切同仇必能竭力捐貲助餉殄此逆氛共享樂利也將此

由六百里諭令知之○實授長臻河東河道總督○調麟桂署江

甯布政使

由浙江布政使調

○命江蘇按察使查文經幫辦江蘇防剿事

宜○以歸德府城被賊竄陷革巡撫陸應穀職仍畱任知府陳介

眉下部嚴議○調察哈爾馬五千匹赴直隸山西備用○己未安

徽巡撫李嘉端奏接據署壽州金光飭等稟稱賊自臨淮水陸兩

路於四月二十六日午刻竄入懷遠三十日未刻至蒙城知縣宋

維屏身受多傷立時陣亡又接臬司張印塘稟稱五月初三日有

賊船千餘隻順流直下當卽會同兼署副將富惠前任副將松安

署知府牛鎮署知縣馮元霑等登城拒守午刻賊船乘風直撲安

慶城下開放大礮攻城我兵抵禦不住漸次逃散初四日丑刻賊

遂竄城而入該司等率領殘兵二百餘名下城力戰萬難抵敵因  
公同商議本郡城池破壞人民盡逃並無倉庫錢糧不如退守距  
城十餘里之集賢關庶不至由此北竄初六日午刻賊果分股撲  
關該司及各文武督同弁兵激勵該處團練開放連環槍斃賊十  
餘人始各退回臣查安慶自正月被賊擾後三營兵丁募補甫經  
足額除分守水陸五十五汛外城防不足千人應用器械亦未全  
備因飛飭廣東官兵以後隊爲前隊折回安慶交張印塘相機堵  
剿集賢關爲通北驛路若能扼住爲害猶淺更須防守裕溪口此  
外如和州之烏江鍼魚背無爲州之泥汊河在在皆通巢湖實屬  
防不勝防且土匪既多必須隨時搜捕方免勾結臣當督率兵勇  
一面搜捕一面追剿又奏臣查四月初九日滁州來稟卽有賊由  
揚州竄出之語近復有廬鳳等處居民被賊裹脅新經逃出者僉

稱揚州竄出之賊共四股其三股坐船南去不知何往此股於初六日至浦口上岸先是臣差楊國慶往揚州大營探聽軍情於四月初五日自揚帶回勝保致臣書面詳覆此事是賊由揚州竄出無疑上諭軍機大臣等本日據李嘉端奏賊匪回竄安慶失守並查明分竄賊匪係由揚州分股竄出復據張芾奏賊船上竄九江籌防等語賊匪分踞三城疊經降旨令琦善向榮督兵進剿及早克復並嚴防其紛竄各路乃至今未能收復一城又任賊匪分竄皖而豫汴梁戒嚴安慶復被竄入賊兵四出防堵愈難見在賊船千餘隻汴流上竄聞向榮遣伊子向繼雄前往追擊復經敗退究竟此項賊船是否卽江南遣散之船抑係被攻逃遁賊船既多回竄我軍艇船師船早經到齊正當乘勢衝擊著向榮怡良許乃釗督飭麟桂和春等將江面賊船盡行攻剿焚燬不可再延時

日至各城逆匪屢被殲擒又多竄出其黨諒必不多著該大臣等設法趕緊進攻儻三城以次收復則北竄之賊自必聞風膽落分兵進剿更易爲功見在賊匪又竄入安慶於三城之外又營窟穴若水路不將賊船截斷但於陸路兩岸頓兵不進甘墮賊匪牽制奸計自問於心安乎當此萬分喫緊之時籌餉旣難徵調亦復不易朕每一念及寢食俱廢該大臣等統領大兵應如何迅圖進取以副朕望耶將此由六百里加緊各諭令知之○諭張芾奏賊船回竄請飭江忠源速赴安慶下游迎剿並請挑選湖廣精兵來江會剿各等語前據向榮奏被脅賊船乘風上駛當降旨令湖廣江西各督撫一體偵探防範本日據張芾奏有向榮之子向繼雄與賊打仗敗回九江之事而李嘉端亦有賊船重竄安慶焚燒房屋該處文武退守集賢關之奏是此項船隻不盡係脅從解散之船

沿江一帶自應合力攻剿該撫業經飛調贛袁各處官兵來省卽著知照湖北張亮基等會商堵擊一面認真舉行團練以定人心儻江岸情形緊要必須出省調度卽著酌量前往勿徒株守南昌張亮基等亦當實力偵探迅派精兵出境應援萬不可專恃設防徒分畛域無濟於事江忠源昨已疊降諭旨令其馳赴河南此時歸德失守城近黃河北省軍情重於江路勢不能不先其所急如該臬司未出江境卽著張芾催令兼程前進毋誤事機將此由六百里各諭令知之○諭李嘉端奏賊船重擾安慶一摺該處瘡痍未復何堪再遭蹂躪覽奏實深焦灼集賢關爲通北要路必應嚴密防守該撫已飭粵兵折回交臬司張印塘相機堵剿並令李鴻章帶勇嚴守裕溪口鳳定懷壽等處土匪均責令該地方官認真緝拏並派李登洲往來搜捕俱著照所奏辦理見在豫省緊急周



天爵已帶兵赴援勢不能兼顧南路卽各路赴豫之兵亦難驟令  
折回呂賢基係特派辦理團練之員當此時事多艱惟當會同該  
撫督飭幫辦團練之署盧鳳道給事中袁甲三荆宜施道趙昀並  
在籍之前任南河總督潘錫恩等剴切宣布朕意無論紳民人等  
果能奮勇殺賊嚴緝土匪著有成效者卽著破格保奏朕必立沛  
殊恩此項義勇別處不得徵調以本地之勇剿本地之賊較客兵  
更爲得力且該紳民等各有身家與其被難轉徙何如互相保衛  
諒必能深明大義志切同仇以期共膺懋賞也將此由六百里加  
緊各諭令知之○諭本日據李德奏請調直隸精兵二千名來東  
操練等語直隸爲畿輔重地與河南山東接壤處所亟應嚴密布  
置此時固不能再加徵調以分兵力然與其畫地自守不如出境  
協剿卽以自固藩籬著該督選派精兵於河南山東兩省毗連處

所準備嚴防確探賊蹤所至卽行出會剿見在山東劉家口已有股匪渡河恩華帶兵迎剿如兵力尙單卽著訥爾經額酌量撥兵援應至畿疆重地一切布置朕惟訥爾經額是賴其隨時妥辦以慰朕懷將此由四百里諭令知之○命前任兩江總督牛鑑赴河南差委○以安徽省城被賊重陷革按察使張卬塘副將富惠松安知府牛鎮知縣馮元霍職仍畱營效力予陣亡知縣宋維屏祭葬世職○庚申諭內閣據光祿寺少卿黃兆麟翰林院侍讀孫鼎臣奏失律之將不宜差遣各一摺所奏自係正論惟見在賊竄豫境河南直隸均須辦理防堵賽尙阿徐廣縉係軍營獲罪大員豈得置身事外且該革員等前在軍營與賊接仗於賊情當能略悉是以發交訥爾經額陸應穀差遣責令戴罪自效並非將該革員等應得重罪遽行寬宥昨降諭旨甚明儻該員等仍不知愧奮

國法具在豈容倖免賞功罰罪朕心自有權衡大小臣工諒能共  
喻也○諭軍機大臣等據雷以誠奏揚城已有可克之機應合力  
圍攻請令勝保從緩啟程等語見在賊匪已由皖入豫周天爵等  
竟未能堵截以致攻陷歸德北省情形萬分喫重必應先其所急  
勝保諒已帶兵啟程著琦善催令前進毋稍遲滯至揚城賊匪因  
守已久該大臣等務當懷遵疊降諭旨迅圖克復勿致該逆再行  
分竄琦善自到揚州初猶奮勉逮賊虜至雖亦屢獲小勝總未大  
挫賊鋒頗不如前汝係曾經獲罪之人朕知汝之才故特用汝汝  
若不能收一葦爾揚城朕爲汝實覺愧憤是時不迅圖克復更待  
何時著限於季夏以前全行掃滅不致又有他虞福濟計已到任  
與查文經嚴扼灣頭一帶合力進攻雷以誠在仙女廟等處勸諭  
練勇亦足以資策應慧成業已有旨令其折回河北勦賊徐州糧

臺應如何分設其保護糧臺兵丁應畱若干並著琦善咨明慧成酌量辦理將此由六百里各諭令知之○諭黃河上下游各渡口早經李德暨前河督福濟等加意防範何以賊匪一到仍復搶船渡河據王履謙奏稱山東劉家口係邵懿辰駐紮之地當逆匪撲來自必飭令地方官將船隻收歸北岸何以忽有偷渡之事著長臻查明情節將疏防渡口之文武員弁一併參處見在李德已調兵前往恩華亦帶兵迎剿著該河督酌量情形有可派兵協剿之處卽行派員帶兵前往以爲聲援仍著王履謙等分飭地方文武嚴防黃河渡口勿令賊匪踵至自干咎戾將此由六百里諭知王履謙長臻並傳諭邵懿辰知之○諭訥爾經額奏調兵籌防一摺歸德失守汴梁戒嚴劉家口已有賊匪竄至直隸大名地方與豫接壤黃河口岸尤關緊要急宜嚴密設防該督調撥精兵令總兵

董占元統帶督同員弁分路守禦並飭藩司張集馨已革副都統德順帶兵前赴大名會同該總兵擇要屯紮計前後調撥防兵共有五千名布置情形尙屬周妥見署正定鎮之山東兗州鎮總兵花里雅遜布尙未啟程赴任著准其暫畱直隸會同防堵惟賊情詭譎避實擊虛是其慣技務宜分設偵探嚴密查訪一有賊蹤迅速迎頭截擊如兵力不敷卽於附近各路官兵趕緊調撥移緩就急總期聲勢聯絡互相策應斷不可株守一隅致令顧此失彼山東河南毗連各要隘有須協剿之處卽飭令帶兵大員出境會剿更可自固藩籬該督出省應駐紮何處督辦著卽酌量情形相機籌度朕亦不爲遙制也又據奏安肅安家莊天主堂旣係歷年相安查無不法情事著照所奏暫行緩辦將此由四百里諭令知之○辛酉諭內閣吏部奏遵旨嚴議議處一摺此案劉秋貴係特旨

交審要犯刑部承審司員郎中陳魯員外郎馮栻不能審出實情  
懼干嚴譴輒復那改日期實屬有心規避提牢主事志善司獄彰  
善均著照部議卽行革職郎中上行走怡昌郎中馮志沂員外郎  
尙阿布候補主事王金銘羅寶森堂主事上行走文荃於陳魯等  
捏改日期未能覺察檢舉亦屬疏忽均著降一級調用准其抵銷  
尙書周祖培意存了事草率塞責著照部議降三級調用毋庸查  
級抵銷其失察司員捏報日期之尙書阿靈阿左侍郎德興羅惇  
衍署右侍郎培成右侍郎許乃普俱著降一級畱任准其抵銷○  
諭見在賊匪竄擾豫省已派大兵前往勦辦所有山東防勦事務  
著恩華瑞昌與李德專辦直隸防勦事務著訥爾經額督同張集  
馨董占元專辦○諭逆匪竄擾河南歸德一帶已有旨諭令江南  
安徽各路統兵大員並陝甘山西添派精兵分路進勦矣本日據

訥爾經額馳奏遵派張集馨楊需並飭大名鎮總兵董占元升任山東兗州鎮總兵花里雅遜布督帶提標大名宣化正定官兵先行馳赴河北會同河北鎮總兵專辦防剿事宜訥爾經額卽日出省督兵接應見在東三盟蒙古王哲里木盟長巴圖卓索圖盟長色伯克多爾濟昭烏達盟長那木濟勒旺楚克等各派蒙古勁兵由熱河圍場前來並調集察哈爾官兵近畿一帶大兵雲集著訥爾經額卽督飭直隸帶兵大員奮勇前進以爲山東河南後路應援京師十萬禁兵均已簡調齊備諒茲么膺小醜裹脅匪徒定可指日殲除也○諭軍機大臣等據張集馨奏賊蹤密邇並請派重兵各摺片覽奏殊深焦急據稱接長垣縣稟報河南甯陵睢州蘭儀三州縣俱已失守見在賊匪聚集蘭儀四十五里之高小集地方長垣逼近該處僅隔一河情形萬分喫緊該署司已將提標兵

五百名飭令先赴長垣並將臨洛關屯紮之宣化鎮兵一千名飭令趕赴大名一帶防堵自應先其所急惟據稱到防弁兵僅二千名未免仍形單弱此外該督所調之兵一時未能到齊著卽飭令帶兵各員趕緊前往黃河北岸一帶扼要堵截毋得稍有延誤直隸爲京師保障賊勢剽悍異常必須急派重兵嚴密堵禦著該督再於該省各營內酌調精兵源源接應並督同張集馨董占元等扼要截剿堵其北竄之路該督仍須趕緊出省督辦一切文報飭令地方官隨時偵探驛路妥慎馳遞勿至稍有阻隔致誤事機將此由六百里諭知訥爾經額並傳諭張集馨知之○河南巡撫陸應穀奏本月十三日據報賊前隊二千餘人由陳畱赴省臣原帶勇三千有餘歸德失利後各兵潰散不少連日收集僅數百名軍火器械半多不堪應用所調永城防兵南鎮官兵均未到營臣隨



身兵勇止百餘名實不足以資攻剿至省城防兵通計不過二千餘名鄉勇二千餘名城大兵單萬難支持且賊已踞劉家口又占睢州壩勢將渡河北岸情形尤爲喫緊臣趕緊催提各兵飛速馳赴省城西北一帶扼要剿截惟賊眾數萬臣見無一旅之師而又乏可靠之將束手無策祇可竭盡心力以期補救所有前懇飭調慧成暨各路援兵仰祈迅賜飛催來豫庶省城可保無虞而河北亦有防備矣又奏逆匪自揚州竄出以來在事諸臣皆以爲僅一  
二千人無足爲慮臣在歸德以數千之師與賊轉戰三日親見賊  
匪以數百人爲一隊有進無退又往往從後鈔襲其由毫至汴者  
約計在數萬以外又據探稱由陳畱至省路中橫排二三十里賊  
勢如此其大而猶云無慮是直粉飾目前以爲推卸地步今之汴  
梁危在旦夕以州圍二十餘里之城兵勇僅止四千萬萬不敷分

布況黃河逼近萬一賊人決河灌城則人皆魚鼈至河北渡口太多賊若於汴梁得手則可渡者不止一處河北之防守宜嚴而神京之豫備尤宜早伏乞 皇上添調精兵保衛京城既可以爲進攻之用又足以備豫不虞沈兆淫林揚祖奏臣等自初十日會同署開歸道張昫等辦理防守事宜十二日據報賊至陳畱分股來省十三日辰刻臣等在城上見有賊自東南紛紛而來於省城東南兩面往來攻撲賊情詭詐未能測其多寡而兵勢旣單城中居民大半逃避撫臣聞在陳州一帶數日內未接文報臣等督同官兵並招募民夫嬰城固守勢甚危急惟有仰懇 聖恩迅速飭直隸山東等省並臨洛關駐紮官兵就近星夜來汴以資救援庶得內外夾擊淨埽妖氛 上諭見在汴省情形萬分喫重本日已諭令舒興阿迅帶陝甘精兵四五千名馳往河南周天爵統帶兵勇

已於十一日馳抵永城勝保亦帶兵於十二日起程本日復諭令趕赴汴梁應援托明阿及善祿等諒均帶兵趕到陸應穀一俟調兵稍集卽與周天爵托明阿勝保等合力奮擊以保危城見在兵力不敷該處團練鄉勇亦可藉資策應該撫卽出示廣爲曉諭令其家自爲守人自爲戰如有殺賊立功者一面奏聞一面卽破格優加獎賞至賊眾數萬多係沿途裹脅之人有無可以設法解散之處著該撫相機辦理豫省人心固結朕所素知沈兆澐等務當激勵兵民嬰城固守以待援兵指日大兵雲集會合夾攻諒不難轉危爲安也並著該撫飛飭署河北鎮總兵崇安嚴防北岸毋稍疏虞○諭前已有旨令周天爵兼程馳赴河南併力攻剿昨據奏稱十一日馳抵永城擬彙齊兵勇決計追剿此股賊匪由鳳陽竄出周天爵援應已屬遲延刻下河南省城萬分危急若再不奮力

窮追汴梁設有疏虞將何以對朕耶周天爵著仍遵前旨督帶兵勇迅速兼程馳赴汴省內外夾攻旣可以救大梁之危卽可以遏北竄之路將此由六百里加緊諭令知之○諭見在賊勢紛竄河南省城情形萬分喫重著舒興阿迅卽親帶官兵馳赴河南合力進攻如山東直隸情形緊要仍遵前旨北行追剿毋稍遲誤其陝豫交界地方著舒倫保張祥河扼要設防不可稍涉大意將此由六百里加緊諭令知之○諭賊匪竄至汴梁往來攻撲城中兵力單弱難以支持情形萬分緊急著托明阿奕經善祿等統帶官兵兼程前赴汴梁會同陸應穀等併力夾擊以解豫省危急並遏賊匪北竄之路奕經善祿所帶各兵均歸托明阿調遣該將軍務與該侍郎提督奮力督剿迅殄賊氛毋稍延緩將此由六百里加緊諭令知之○諭前有旨令察哈爾都統豫備馬隊官兵四千名

赴張家口屯駐備調見在賊匪竄至河南畿輔重地自應豫爲防範著華山泰迅卽統帶此項官兵來京聽候調遣再前調察哈爾馬五千匹計已解赴直隸山西兩省著再挑騰壯馬五千匹迅解來京以備官兵乘騎毋稍遲誤其察哈爾都統著盛桂暫行署理將此由五百里諭令知之○勝保奏臣前准琦善咨會由臣帶兵馳赴滁鳳追剿北竄之賊卽帶正定天津二鎮標兵一千名及先挑川勇三百名並琦善咨交湖廣壯勇六百名於五月十二日自司徒廟起程由安徽天長五河等縣一帶行走沿途探明賊蹤晝夜兼程相度機宜總期繞出賊前迎擊以扼其北竄或賊竄在前當由閒道設法截剿並遵旨於續到官兵內酌量調撥前進仍先行飛咨奕經托明阿周天爵李嘉端等無論何處遇賊務須和衷商辦分路夾攻迅掃妖氛又奏見由臣琦善撥來臣行營銀三萬

兩又帶赴臨淮營銀一萬二千兩交黑龍江馬隊統計僅敷兵勇一月之用若賊匪早就殄滅則糧臺不必另籌然賊蹤無定行止靡常設須添調兵丁勦辦恐距徐州糧臺稍遠卽難源源接濟可否仰懇 皇上飭令山東河南安徽等省於藩庫及鹽務項下隨時撥解到營以便接濟 上諭賊匪見已竄偏汴梁勝保帶兵進勦無論行抵何處如糧臺未能源源接濟准其就近提動各府州縣庫銀倉穀以濟急需見在賊撲汴梁河南情形萬分喫緊勝保著卽星速前往赴援毋稍遲誤將此由六百里加緊諭令知之○諭前據張芾奏賊船回竄九江當經諭令張亮基等會同堵擊派兵應援本日據江忠源奏所帶楚勇僅存一千二百餘名戰守俱形單弱等語著張亮基等迅卽揀派精兵數千名馳赴九江交江忠源管帶如能遏賊紛竄亦可以保固楚省藩籬至湖南見勦土

匪亦屬需兵之際已諭令雲貴督撫調兵四千前赴湖南以備遞  
撥該署督等接奉此旨著卽先將本省兵酌調前赴江西諒能統  
籌全局先其所急斟酌辦理將此由六百里加緊諭令知之○江  
忠源奏臣於四月初七日自鄂啟程初八日接署督臣張亮基撫  
臣崇綸札委順道勦辦廣濟縣匪徒二十一日准安徽撫臣飛咨  
粵匪分股竄擾滁州飭卽帶勇由捷徑馳赴豫皖界上扼要堵截  
二十五日復奉旨俟廣濟事竣再赴江南臣於二十七日將大金  
坂巢穴焚毀並將張東銘捕獲餘匪膽落四散逃匿見在大局已  
定交署提臣阿勒經阿接辦臣卽於初三日自廣濟帶勇起程初  
五日夜分行抵九江接到江西撫臣張芾等札稱賊船千餘隻乘  
風回竄九江存城兵力無多飭臣酌量緩急情形辦理如賊未過  
太平蕪湖卽會同江南官兵合力攻擊如賊已抵皖城卽折回九

江下游一帶擇要扼勦初八日臣正在督派弁勇乘舟前往接據

探報賊匪分股回竄乘船千餘隻順風駛上已於初七日至彭澤

縣臣急擬帶勇迎擊惟楚勇僅存一千二百餘名兵力單弱礮位

全無江面寬至十餘里沿途無險可扼倉卒遇賊不惟攻擊難施

兼恐措手莫及當卽督帶弁勇入城分塚堅守惟潯城過寬合計

一千七百八十餘塚臣所帶楚勇不敷守塚之數九江存城兵丁

六百餘名皆係未經戰陣如果賊匪回竄攻城兵力過形單弱臣

身受 聖恩惟激勵將士竭力堵禦與城存亡仍一面飛探下游

消息再行設法辦理又奏臣奉旨幫辦軍務任大責重見在賊匪

分股回竄大營隔絕聲息不通可否懇恩飭下雲貴湖南督撫臣

簡派精兵數千名飭令迅速來營交臣管帶臣並擬差弁歸里添

募壯勇三千湊足萬人自成一軍兵力既厚戰守有資臣當躬率



將士竭力埽除與賊勢不兩立如有不效卽治臣之罪 上諭九

江爲江西湖北兩省關鍵賊旣回竄堵禦尤關緊要此時鳳陽之賊竄入河南江忠源馳往救援已恐緩不濟急著卽駐紮九江府城妥爲布置本日已諭令湖廣督撫迅調重兵前來策應另片奏擬差弁回湖南添募壯勇以資戰守具見急公惻枕該臬司感受暑溼是否業經全愈此股賊匪中有無被脅難民堪以解散之處並著會同該撫張芾相機妥籌辦理見在賊勢飄忽靡常儻由江西被擊逃散而北省一帶情形緊急該臬司仍遵前旨先其所急馳赴救援毋稍拘泥○諭理藩院前據哲里木卓索圖昭烏達三盟長等以軍務未經蒞事情願各備兵一千名前往軍營等語目下逆匪尙未勦滅著由哲里木卓索圖昭烏達三盟內各選健銳蒙古兵一千名將器械火藥鉛丸等物備妥由該王公台吉塔布

囊等各盟各派精明之人帶兵前往熱河木蘭牧場紮營以備調遣毋庸該盟長帶兵前來該院接奉此旨卽馳驛由五百里依限行文傳諭該盟長等知之○諭前據錫林郭勒盟長多羅郡王齊旺札布等恐軍營應用馬匹不敷調用情願捐馬三千匹等語目今已調東三盟兵丁必須馬匹著卽照該盟長郡王齊旺札布等前次所請由各盟下捐馬三千匹擇其臚壯者護送熱河木蘭牧場以備調撥該院接奉此旨卽馳驛由五百里依限行文傳諭該盟長等知之○諭本日有旨調哲里木卓索圖昭烏達東三盟蒙古精兵三千名諭令迅卽前赴熱河哨內地方屯紮以備調撥著毓書飭令地方官豫備米麪接濟其鉛丸火藥等項除該官兵自行備帶外仍須寬爲備辦並飭圍場總管那敷德前往照料應如何紮營操練一併妥籌辦理至錫林郭勒盟長齊旺札布等前次

呈進馬三千匹見已調來著那敦德擇水草茂盛之處牧放俾皆  
臆壯可期得力俟調用時官兵馬匹均可由十八盤一路進口仍  
應先期知照經過地方一體照例豫備將此由四百里諭令知之  
○調翁心存爲刑部尙書以許乃普爲工部尙書雷以誠爲刑部  
右侍郎降周祖培爲左副都御史○調德興爲工部左侍郎以常  
志署刑部右侍郎由兵部左侍郎兼署○調恆春爲刑部左侍郎以善燾爲  
盛京工部侍郎由前烏里雅蘇台參贊大臣遷○以易棠署陝甘總督寶授哈芬  
山西巡撫○命刑部右侍郎雷以誠幫辦揚州軍務○命前任山  
東布政使劉源灝暫畱幫辦防堵事宜○調雲南貴州兵各二千  
名赴湖南備撥○壬戌諭內閣逆匪負固金陵揚鎮分竄皖豫疊  
陷城池狡譎兇殘神人共憤方其初竄浦口不過一二十人經吉  
林官兵於六合地方奮擊痛殲不下數百其長髮真賊自臨淮西

奔者爲數實已無幾乃沿途裹脅擄掠貲財焚燒廬舍滁鳳蒙亳之閒被其蹂躪實惻朕懷見在各路大兵分道攻剿諒茲小醜不難計日埽除惟該逆鋌而走險飄忽靡常所過地方居民人等或因猝不及防紛紛遷徙轉遭荼毒是避害而實以罹害何如自相保衛奮勉圖功乎本年正月特降諭旨令各省仿行嘉慶年閒堅壁清野之法旋諭中外大員各舉所知襄辦團練諒已次第舉行我朝 列祖 列宗深仁厚澤淪浹民心凡食毛踐土之民莫不尊親共戴當此逆氛未靖必有忠義勇敢之士奮迹草茅建奇功而膺懋賞者如從前楊遇春楊芳等均起自鄉里致爵通侯比年廣西湖南等省紳民團練剿賊無不立予恩施卽如幫辦軍務之湖北臬司江忠源亦以居鄉團練屢著勞績超擢監司可見練勇之中人材輩出凡爾士民同茲觀感至北地民風素稱驍勇安徽

河南山東江南交界地方不乏奇傑之材能爲民禦災捍患其有自備資斧募勇投效軍營殺賊立功者統兵大臣卽覈明該士民募勇名數立卽奏請優獎或給官職或給翎支勇號以爲急公嚮義者勸其在本籍團練保衛鄉閭一遇賊匪竄至卽行合力殲擒則捍禦之功亦與效力行閒同其賞賚地方官吏仍不得擅行徵調致令遷地弗良如此實力奉行以兵衛民卽使民自衛俾賊進無所掠退無所據散其黨與殲厥渠魁烏合之寇不足平也至從前被脅之徒或以驕橫結怨里黨或以桀驁誤蹈刑章若能勦賊自效卽可立荷恩施如張國樑之擢都司張鳳山等之賞給頂帶明徵具在卽或先被賊誘自拔來歸但能改過自新亦可同邀寬典此朕仰體 上天好生之德除惡安良之意各該大臣將軍督撫等著卽刊刻謄黃徧行曉諭咸使聞知○諭自逆匪竄擾粵

楚以來所過州縣地方動輒失陷卽省會郡城如安慶九江等處亦未聞有挫遏兇鋒嬰城固守者推原其故總由地方各官先存一倖生畏死之心遂將土地人民委之不顧實堪痛恨前經降旨諭令統兵大臣及守土大吏將失守城池各員查辦乃或稱下鄉募勇或稱遇救得生曲爲隱飾且有久未查明入奏者似此遇賊逃避之員若不嚴行懲辦何以肅國紀而儆將來著各該督撫大吏凡有失守地方未經覆奏各員迅卽查明按律定擬具奏並著該部分別催查儻仍延玩卽將該管上司參處○諭自逆匪竄踞金陵揚州鎮江以來疊經降旨令琦善向榮迅速督兵克復並嚴防逆匪分竄之路乃至今兩月有餘該大臣等各擁重兵未能收復一城以致另股賊匪由安徽竄至河南重煩徵調琦善向榮均係獲罪之員經朕棄瑕錄用若再不知感知懼剋期收復三城坐

使賊勢蔓延勞師糜餉國法具在該大臣等其各懷之○江甯將軍托明阿貴州提督善祿奏五月十二日臣等馳抵歸德聞得本月初七日賊陷歸德撫臣陸應穀於歸德城外與賊接仗未能獲勝賊竄汴梁臣等督兵進剿並飛咨勝保奕經等遵旨督兵前進互爲聲援仍應請旨飭下山東陝西直隸各督撫迅速撥兵扼要堵截見在參將樂桂在歸德收復潰兵請卽畱在歸德駐守並添派遊擊常有撥兵協同防守再遊擊成明於五月初九日帶兵九百名趕至歸德大股賊匪已去因有土匪在城搶掠已經該遊擊帶兵剿除並安撫逃回難民請將該員及所帶弁兵隨同臣等進剿逆匪以遏兇鋒得旨應如何進剿截畱隨時斟酌辦理江南諸軍旣統歸托明阿調遣責有攸歸無可推諉汴省緊急萬分以速速援救爲要又奏鹽菜口糧請統歸徐州糧臺支領批汝所帶兵

原係徐州糧臺支應若應有變通之處可卽行知照勿庸事事請旨徒延時日○命御前大臣僧格林沁步軍統領花沙納右翼總兵達洪阿內閣學士穆蔭督辦京城巡防事宜○癸亥諭內閣前經疊降諭旨令步軍統領順天府五城遇有形迹可疑之人密訪嚴拏懲辦乃數月以來報獲之案甚屬寥寥總由各司坊營汛地方文武官員奉行不力之故京師重地豈容奸宄潛藏著步軍統領巡視五城御史於內城各按地段認真嚴查其外城地方著巡視五城御史及營汛各員實力稽察並著於東城添派袁溥黎吉雲南城添派彭久餘賈士行西城添派張祥晉湯雲松張煒北城添派雷維翰吳廷溥史策先中城添派李宗燾姚福增會同各該城御史於城外所屬地面嚴密稽查仍著左副都御史文瑞載齡李茵周祖培於內外城隨時稽察無論司坊營汛地方各員稍有



爲具文致干重咎○諭軍機大臣等據御史陳慶鏞奏漳泉會匪滋事請飭調幹員以資剿辦一摺臺灣道徐宗幹著卽令酌帶弁兵內渡赴漳泉等處協同剿辦所有臺灣道印務卽著該府護理以便徐宗幹交卸迅速啟程該署督仍於通省道員內遴選派往署理其所稱已革知府王光鶚降調知縣吳金華二員是否見在閩省堪資委用著查明酌量差遣丁拱辰係晉江大族卽可派令辦理團練以助兵力將此由五百里諭令知之○沈兆雲林揚祖奏臣等因汴省兵單招募民勇與官兵一律登陴十三日該匪等往來城東南兩面施放槍礮經臣等督飭兵勇用千餘斤大礮向其開放賊避至離城數里之繁塔寺屯紮十四日黎明臣等激勵兵勇中敢死之士多人縋城而下攜帶火彈將賊占村屋焚燒莊

內餘匪盡行殺斃午後又有賊從東來或騎或步皆離城數里繞道而行內有近城探視之匪經兵勇下城追擊殺斃十餘名生擒十名正法傍晚賊望西南行走在遠屯集該匪夥黨甚多近聞已竄赴距城四十五里之朱仙鎮誠恐陸續裹脅勢益猖獗臣等惟督率紳民兵勇固守城垣目前尙可勉力支持所慮者匪勢日增我兵寡不敵眾汴省係畿輔門戶城西二十五里黑岡地方緊臨大河萬一賊匪盜決有不堪設想者伏懇催調官兵星夜馳赴汴城救援並調提臣善祿前赴安徽宿州一帶官兵急回豫省以資堵禦又奏前漕督周天爵侍郎呂賢基聞帶領兵勇駐紮宿州一帶此時賊由歸德西竄開封睢州杞縣陳畱等處道路梗塞文報難通不知周天爵等見紮何處可否迅飭該侍郎等帶兵數千名閒道前來一面由臣等稟催撫臣繞道回省合力攻剿保護省垣

克復歸德 上諭該匪有竄赴朱仙鎮之信非外援迅速趕到與城內防兵協力夾攻難解倒懸之厄周天爵不能於亳州一帶闌賊北竄致令直撲汴梁遲誤已難辭咎若再遷延不進於心何安該侍郎卽星夜兼程赴援與恩華托明阿善祿陸應穀等急籌解圍毋再遲延致誤事機原摺片鈔給閱看將此由六百里加緊諭令知之○命已革大學士賽尙阿襄辦巡防事宜○調許乃普爲刑部尙書翁心存爲工部尙書○調盛京兵四千名吉林兵二千名大凌河馬二千匹命錦州副都統維祿伯都訥副都統倭克精額統帶赴天津備調○甲子諭內閣理藩院奏遵議諾們罕等名號一摺此次查辦番務出力之掌辦達賴喇嘛商上事務阿齊圖諾們罕遵奉達賴喇嘛諭飭撥調土兵將鄰境不法番民認真查辦俾地方悉臻靜謐著加恩作爲喀徵阿齊圖呼圖克圖並著准

其轉世察木多帕克巴拉呼圖克圖額爾德尼諾們罕之呼畢勒罕雖在幼齡卽能督飭屬下拏獲兇犯多名著賞加敕遠禪師名號以示優異○琦善慧成陳金綬奏臣等因勝保於本月十二日帶領兵勇由天長迎剿竄賊恐揚城賊匪乘我移兵倥偬之時突出潛襲因於十二日臣琦善攻打北面諭令德興額等嚴防南門陸路臣陳金綬攻打西面臣慧成攻打東面十三十四等日陸續會攻該匪因連日攻城緊急在南門河東搭架浮橋將西門大礮移併南門城上並於南面城垛添設槍礮臣等亦飭弁兵將水湖浮橋折毀便益舊南兩門屢有賊匪潛出均被官兵迎擊仍潰入城廣儲門竄出賊數較多雙來聞信趕往督同擊斃數十人招出民人陶淦等四名訊據供稱前日炸子打入城內擊斃賊目賊眾甚懼計在死守臣琦善用反閒法繕寫告示多張諭令如能獻獲

賊目來營不但免死並與奏請賞給官職隱約其詞用火箭射入城中使逆賊死黨見之互相猜疑此連日會攻揚城之情形也昨據派防浦口武慶開隆阿等呈稱五月初八日三更時分在金堂門外巡哨見江面有賊船四五十隻正在查看閒忽從蘆葦中出有賊匪二三十人鳴鑼喊叫經武慶等奮力攻擊賊匪落河淹斃復在蘆葦中搜獲二十餘人當即殺斃燒毀賊船十餘隻奪獲賊匪大船一隻頃又據淮徐道王夢齡稟稱賊匪初六日自亳州分竄歸德初七日午刻歸德失守准周天爵咨稱已帶兵赴歸德救援此外托明阿奕經善祿等未知行抵何處臣刻已飛咨托明阿等迅速帶兵前赴河南合力堵剿又函商恩華等酌量情形將徐州清江兩路並顧見在賊匪竄至歸德距揚州較遠設向開封竄擾則衛輝爲扼要之地須調北來重兵防守更有蘭儀渡河徑至

考城曹縣一路臣琦善已飛咨勝保就近相機辦理免致往返札

商有誤事機 上諭軍機大臣等前因揚城日久相持疊經降旨

令該大臣及早克復並有旨令於季夏以前全行掃滅茲據奏稱連日會攻揚城情形雖經獲勝總未得手逆匪窮而思竄若能嚴防水陸竄路並用反閒解散黨與自可計日克復該大臣既知官兵奮勇直前逆賊卽行敗退正當乘此激勵將弁兵丁一鼓作氣若再遷延試問貽誤之罪將誰屬耶前有旨令慧成帶兵折回河北將雷以誠畀以幫辦軍務重任著琦善陳金綬與雷以誠會同迅速攻剿毋再觀望見在汴梁被圍待援孔亟已諭令恩華托明阿善祿等前往協剿如早復揚城賊匪聞風膽落分兵會擊不難迅掃妖氛也北省軍營熟悉賊情者甚少著琦善於所帶將弁並直隸弁兵中各揀數人迅飭前赴直隸交訥爾經額差遣○周天

爵奏臣於五月十一日追賊至河南永城縣十三日接據署江南  
徐州道王夢齡稟稱賊匪攻陷歸德府後又分股至劉家口一帶  
搜搶船隻意圖東下徐城距該處三百餘里黃河一水可通卽西  
南蕭碭兩縣陸路處處可以分竄請將舉人臧紆青所募壯勇一  
千五百名飭令星夜管帶來徐協同防守並請酌派勁兵前往永  
碭宿交界之處扼剿以爲徐州上游聲援查宿徐一路西赴潼關  
北達兗濟必得重兵駐守臣惟馳抵碭山黃河南岸專守中路就  
近與呂賢基奕經等會商防剿上諭自賊匪由皖入汴節次諭  
催周天爵赴援朕意該侍郎定已兼程前進茲據奏請扼守宿徐  
黃河以固中路一摺該侍郎奉命勦辦賊匪未聞督率兵勇與賊  
接仗今大梁危急而該侍郎折赴碭山欲其援救汴梁城已屬無  
及旣據奏稱徐州水陸各路形勢均爲緊要卽著該侍郎扼守徐

州妥爲布置沿河要隘督飭嚴查儻有賊匪偷渡惟周天爵是問  
徐州糧臺見已移往宿遷該縣係賊紆青原籍著卽飭令帶同練  
勇守護糧臺並嚴緝土匪毋稍疏虞將此由六百里諭令知之○  
諭昨據沈兆澐林揚祖奏省城防守情形並請飭催援兵各等語  
已諭恩華等星夜前進赴援矣該紳民等志切同仇協力固守甚  
屬可嘉見在托明阿善祿計已抵汴恩華亦由曹州南下計日當  
亦到汴勝保早經啟程由皖赴豫指日大兵雲集定可保此危城  
著沈兆澐等傳旨曉諭該闔城文武紳民人等如能始終不懈保  
守省城必當破格施恩以酬勞績並著沈兆澐等將尤爲出力官  
兵士民先行酌賞軍功頂翎以作士氣至賊匪藏匿民房及繞道  
遠行難保非別有奸計或係潛用地雷或係偷挖隄岸皆須密爲  
偵探加意防範黃河北岸已飭長臻李德撥兵嚴防陸應穀此時



是否到省所調之兵共有若干鄢陵迤北有無梗阻總須內外夾擊勿徒株守並密探賊中動靜嚴察城內奸細廣爲曉諭以定人心將此由六百里加緊諭知陸應穀並傳諭沈兆雲林揚祖知之○諭陳啟邁奏移設糧臺一摺賊匪紛竄皖豫距徐州較近糧臺自應移設著准其移往宿遷相機保衛仍著隨時偵探賊情嚴查土匪徐州兵力較單賊紆青籍隸宿遷已飭周天爵飭令該舉人帶領練勇協同官兵守護糧臺矣陳啟邁係承辦慧成恩華等北路官兵糧餉茲慧成已赴河北迎剿恩華赴汴應如何分派糧臺各員源源接濟之處卽著陳啟邁會同鄭敦謹妥籌辦理見在鄭敦謹所辦琦善軍營糧臺亦同移至宿遷儻日後情形不同仍著該藩司等妥籌擇地布置將此由六百里傳諭陳啟邁鄭敦謹知之○乙丑諭內閣陸應穀奏參徵調不前之總兵參將請分別降

革畱營以覩後效各等語河南河北鎮總兵王家琳帶兵駐紮永城經該撫飭調赴省屢催罔應山西潞澤營參將達凌阿奉札赴援四日之久僅行數十里似此畏葸遷延膽敢不遵調遣實堪痛恨王家琳達凌阿均經先行革職仍責令帶兵作爲前隊儻再不知奮勉卽著於軍前正法以昭炯戒近來將弁遇有檄調往往意存觀望藉詞逗遛甚至屢奉札催悍然不顧此等貽誤軍務之將弁若不按律懲辦何以儆戒將來見在北省均辦理防堵如有臨陣退縮及不遵本管官徵調或託故遲誤者著統兵大臣督撫等一面據實參奏一面卽行正法斷不可有意姑容自干罪戾懷之

○諭軍機大臣等向榮統領重兵株守金陵城外日久未能克復而賊匪分股肆擾由皖入豫安慶滁州歸德等處相繼失陷見在直撲開封勢甚危迫雖調兵援應深恐緩不濟急總由各路精兵

皆在金陵鎮江揚州三城之下以致不敷調撥正中賊匪牽掣之計思之不勝憤恨著該大臣等懷遵疊次諭旨督率將弁激勵兵勇剋日進攻收復省城毋得再有觀望金陵爲賊首盤踞之所一旦攻破其勢瓦解並可分兵協剿他處且首逆旣殲餘匪不難殄滅向榮經朕屢次赦罪錄用自當奮發天良勉力圖報若不能攻克金陵何顏對朕從前在廣西時賽尙阿優容寡斷不能用汝之力勿謂見今可用故智欺朕朕非賽尙阿比也本日據張亮基等奏賊船上竄抵彭澤後數日未聞攻城掠地是否實係解散之眾未接江南大營來咨礙難辦理等語此股賊船旣不沿途搶掠又何竄擾安慶又與向繼雄接仗殊不可解著向榮確切查明飛咨上游各省督撫妥爲豫備以後遇有散出人船或給與護票免死牌遣令分起行走卽須知照前途免致驚疑但須偵訪確實毋致

中賊詭計並飭令麟桂和春等督率師船迅速相機攻剿勿任賊匪竄過北岸再致蔓延大營近日軍情未據奏報並著迅速詳奏以慰朕懷直隸見辦巡防該大臣營中有熟悉賊情通曉紮營接仗事宜之將弁兵丁著卽迅派一二十人前來直隸交訥爾經額以備差遣前有旨令瞿騰龍酌帶兵勇馳往河南山東一帶確探賊蹤協力攻剿見在想已啟程仍著向榮飛催前進河南山東何處緊要卽著帶兵赴援無任延緩將此由六百里加緊諭令知之○諭陸應穀奏省城被圍緊急催調各路官兵一摺逆匪大股圍攻汴梁賴該處紳民兵勇登陴固守業經數日必須各路援兵趕赴救應方能轉危爲安陸應穀駐紮許州催調各路官兵若必待兵皆到齊始行前進豈不有延時日貽誤事機經文岱已有旨令暫署河北鎮總兵著卽管帶見到之兵一千九百餘名迅赴省城

接應萬不可稍有遲誤。托明阿善祿統帶之兵前據奏稱於十二日行抵歸德十三日卽帶兵前進該處去省二百餘里計兩三日卽可趕到。何以至今尙無到省信息。省城萬分危急。若有疏虞。陸應穀爲守土大吏豈能當此重罪。托明阿總統河南諸軍與善祿等均係特派大員。屢次催令迅援汴梁。亦豈容稍事遲延。陸應穀仍飛催所調各路援兵迅赴省垣以資接應。勝保自皖入豫。恩華由山東赴汴。計日均可趕到。昨據沈兆澐等奏賊於十四日傍晚望西南行走在遠村屯集層層埋伏尙未測其動靜。本日據陸應穀奏賊分股竄擾朱仙鎮約有萬餘人阻塞歸路。賊情詭譎往往以退爲進。總宜探明賊蹤扼要兜剿。萬不可墮其奸計。將此由六百里加緊各諭令知之。○諭瑞昌奏行抵汶上據李德差官截畱請旨遵行一摺。瑞昌所帶盛京兵一千名本令赴慧成軍營。昨因

河南緊急復令與恩華酌量前進見在恩華想已抵汴而該將軍  
尙住汶上山東與豫毗連兵力較單亦關緊要瑞昌卽著統帶盛  
京官兵會同李德相機防剿聞李德已折回東境何以數日未見  
奏報見在山東地方如何布置曹河上游究竟有無賊匪偷渡著  
李德隨時飭令地方文武嚴加防範萬不可稍有疏虞將此由六  
百里加緊各諭令知之○諭據哈芬奏派兵籌防要隘並請調撥  
鄰省官兵以資捍衛一摺該撫因賊竄汴梁已派太原鎮總兵烏  
勒欣泰帶兵駐紮澤州府隘口復派道府大員防守黃河渡口並  
飭各州縣嚴密盤查奸細辦理尙屬妥協惟據請調鄰省官兵見  
在直隸山東俱與河南接壤陝甘亦防守綦嚴實屬無可徵調著  
該撫將本省存兵移緩就急相機布置如再不敷卽著於綏遠城  
及察哈爾官兵內酌量調撥以資防守賊匪避實擣虛是其慣技

惟在偵探確實嚴防要隘勢難處處派有重兵且兵分則力單該撫體察情形隨時相機籌辦尤須鎮定人心毋任紛紛遷徙將此由五百里諭令知之○命兵部尙書桂良赴直隸省城督辦巡防事宜○以巴里坤鎮總兵官經文岱署河南河北鎮總兵官幫辦河南軍務○丙寅諭內閣給事中長秀奏順天府屬各營武職請歸兼尹府尹稽查一摺順天府本有兼轄武營之責當此籌防之際稽查尤關緊要見在直隸總督既赴南路巡防所有順天府屬各營武職卽著該兼尹府尹督率嚴定巡緝章程實力奉行以昭周密儻武職內有不能得力之員及疏防案件卽由該府尹等一體嚴參○向榮許乃釗奏查江甯省城東南兩面該逆防守最嚴惟北面神策太平等門設備稍疏門外均有賊營衛城必先去其營壘乃能得手先於初八日密派總兵音德布等分布疑兵別選

精兵潛攻神策門該逆出營拒敵我兵奮力攻擊共斃賊匪三十餘人生擒二十三名初九日密令翼長總兵馬龍和春等選擇精壯兵勇四千人改裝易服距太平門外五六里駐紮初十日丑時馬龍和春等用雲梯橫架濠上渡過兵勇一擁齊進營中長髮賊斬殺殆盡我兵乘勢各將雲梯上城惟城上火罐火瓢等物勢如雨下斷我繼進之兵該總兵等始收陣而歸僅將賊營三座一齊踰毀通共殺斃賊匪約七百餘人生擒九十餘名至上竄賊船復陷安慶臣計江忠源所帶楚勇當已行抵江北即可助剿又奏連日探得江水盛漲已沒七里洲所有洲上賊營望樓礮位皆已漂沒無存卽賊所造浮橋木筏亦一概衝去毫無闕阻見在南岸賊船雖約有一千號而船舵篷索俱全者僅十之三水手亦復寥寥該逆恐其逃散一空聞欲另紮水寨以爲防範至我處上游礮船



本少此時分駐太平蕪湖江口並有跟蹤前往江西等處查探情形者未免更形單薄止好隨時相機辦理又奏臣向榮先因上游礮船太單難禦大幫衝突之船因檄總兵和春在於下游酌調艇船二十隻駛至上游幫同抵禦該艇船遷延不進又委浙江藩司麟桂查明據實揭報茲據報稱上海局艇船十隻隨船九隻原係該處紳等雇募素無紀律去留自便其吳健彰所雇洋船三隻屢催接仗藉詞遷延臣等已札調吳健彰星速前赴鎮江所有廣艇局艇二項船隻責成麟桂吳健彰約束調度一切勦堵機宜務與各鎮將和衷籌畫不得稍分畛域上諭軍機大臣等逆匪攻撲汴梁勢甚危急昨已諭令向榮剋日收復金陵乃據向榮許乃釗報到仍係小勝並未攻入省城殊深焦急北路勁兵多在大江南北若不及早克復三城更有何兵可以派撥接應豫省且山東直

隸均已籌辦防堵而統兵大臣仍復徘徊江上貽誤之罪將誰屬耶著向榮等迅速進攻毋得再有觀望甘蹈重罪至上游駛竄各船是否均係真賊所奏殊未明晰仍須確查隨時知照鄰省嚴防妥辦江水盛漲賊之浮橋木簞俱被衝斷正可趁此督飭艇船乘風進擊和春已調回大營卽吳健彰趕到與麟桂皆屬文員仍著向榮嚴飭統帶水師鎮將各員迅速相機進取毋得互相推卸致誤事機將此由六百里諭令知之○諭昨因賊竄汴梁疊經諭令舒興阿親赴河南進剿並令舒倫保張祥河於陝豫交界地方關津要隘嚴密防守陝西提督桂明著卽迅帶得力將弁兵丁馳赴陝西會辦防剿事宜毋稍遲誤將此由六百里諭令知之○山東巡撫李鴻奏接據曹州府縣稟報賊於初八九等日分竄劉家口時該縣知縣姚景崇已將收泊北岸船隻全行燒毀旋從曹河上

游來船二隻行至中流姚景崇見係賊匪旗幟督令兵勇用礮擊  
沈傷賊約二百餘名後亦無船繼進初十日瞭望賊已陸續西行  
十一日劉家口上下一帶均無賊蹤臣思賊匪分竄所向披靡設  
非天險河流早已北竄深入此次南岸劉家口賊匪不下數千究  
因船隻收泊燒毀不能徑渡可見守河之效信而有徵惟自河南  
府以下河道縣亘數千里在東省曹單止有二百數十里餘皆直  
隸江豫三省所轄卽如曹河以上南岸上下皆爲豫省地而北岸  
卽係直隸東明長垣地面應請諭令直隸督臣速調重兵督飭大  
名鎮遊擊在東明長垣河干迎頭截擊並豫省河北鎮在懷慶衛  
輝所屬河岸截剿並請飭令托明阿周天爵由河南虞城一帶卽  
日馳赴汴梁會同豫省撫臣合力圍剿四面接應使賊腹背受敵  
庶可力圖剪滅再臣已於十八日折回兗州與尙書臣恩華杭州

將軍臣瑞昌面商一切卽行趕往曹屬竭力籌辦又奏臣於宿遷回覓途遇托明阿所帶歸化城官兵二百五十名已令折回由曹縣一帶渡河其瑞昌管帶之盛京官兵尙有五百名未出東境亦令折回留於東省防堵較之南至淮揚又轉回豫省旣免繞道跋涉又可迅速進行第見在賊匪聚於豫省援師尤不容稍緩應請飭令慧成管領兵丁毋容北渡黃河繞道卽由清江浦黃河南岸馳赴汴梁迎頭截擊再自王家營至宿遷一帶兵力頗單臣遠在曹單難以兼顧查有奕經管帶之山西官兵一千名前由托明阿調赴徐州應請飭令回清江之王家營駐紮以專責成 上諭本日據李德奏此時賊未渡河豫省情形較東省更爲緊急請飭慧成由黃河南岸直達汴梁迎擊見在恩華業已赴汴慧成著仍遵前旨由黃河北岸徑赴山東與李德嚴防河口如東省情形較汴

梁尙可稍緩卽帶兵渡河赴豫援應賊勢飄忽靡常統兵大員總宜擇要進剿若稍涉拘執牽制轉恐耽延時日致誤事機將此由六百里諭令知之○諭東省曹單河岸僅二百餘里餘皆直隸江南河南三省所轄見在賊撲汴梁直隸之東明長垣一帶豫省之衛輝懷慶等府江南徐州上下各河口岸均關緊要如果節節嚴防逆船斷難飛渡著訥爾經額長臻楊以增各飭沿河文武員弁實力防守如有匪徒偷渡務當立時截擊毋令片帆北駛儻該管官巡防不力或因地界犬牙相錯藉詞諉卸致令賊船乘閒搶渡朕惟該督等是問將此由六百里各諭令知之○諭寄諭正白旗滿洲都統前據該都統奏稱已革署湖南岳州營參將阿克東阿之子恩榮呈報伊父殉難自盡見由揚州扶柩到京等語本日楊以增奏阿克東阿在海州呈遞親供就近自首是該革員並未陣

亡前次恩榮所扶之柩必須確查係何情弊見已傳旨派王明前往著卽傳集阿克東阿家屬眼同開棺查驗據實具奏將此諭令知之○丁卯諭軍機大臣等訥爾經額奏派兵籌防並請飭山西官兵毋庸改道等語已諭知哈芬飛飭赴調各官兵徑由平定州馳赴直隸矣直隸防堵緊要經該督先後調撥本省兵八千名茲復添調督標及天津通永二鎮標共兵二千名爲數亦不爲少該督既經出省卽著先就見調之兵酌量緩急擇要屯紮一面飛催後起官兵兼程赴防如有應須出境援剿之處卽著相機策應直隸與豫省河岸毗連之處雖以東明長垣爲最近而彰衛各屬與大名廣平處處接壤若豫省稍有疏虞則直隸藩籬亦難自固陸應穀見在赴援汴梁省城恐未能顧及河北該督既探聞河南考城祥符蘭儀各渡口並無一兵防守卽應趕緊知照陸應穀王履

謙長臻等迅將船隻收集北岸仍飭所屬一體認真稽察方爲不  
分畛域若必俟請旨轉飭已遲誤矣本日有旨令花里雅遜布暫  
署河北鎮總兵仍歸該督調遣該督呼應旣靈該總兵亦責無旁  
貸其彰德等府所屬凡在大河迤北者均可一律布置果能嚴扼  
河口直省自可無虞該督於應辦事宜及應隨時知會鄰省情形  
俱著迅速籌辦無誤事機將此由六百里諭令知之○江西巡撫  
張芾奏臣查逆船乘風直上下游湖口南康吳城各處駐兵無多  
省城守兵不滿三千益以官紳兩局團練壯勇亦僅二千餘名曾  
飛調贛州鎮兵八百名及袁州銅鼓各營兵六百名來省防堵但  
贛鎮離省太遠即使剋期抵省兵力亦甚薄弱臣思九江府僅贛  
空城江西省垣本係完善之區且爲大營糧臺根本今該逆大股  
來撲係攻我腹心阻我餉道之奸計查江忠源見駐潯郡所帶楚

勇一千七百名暨九江鎮所調附近各營兵一千餘名離省較近見在賊船已有徑趨省城之勢正可從後追剿惟恐該護鎮羅玉斌因有守城之責不敢擅離並以防賊回竄爲辭堅畱江忠源不令前來則九江兵勇三千置諸無用之地而省垣束手無策反無救援之師萬一困守旬日力竭計窮後事更不堪設想相應請旨飭下湖北臬司江忠源星速帶勇來省救援並飭令羅玉斌統帶九江鎮標暨所調附近各營官兵來省防剿或駐紮吳城鎮以固省城門戶至向榮統領重兵見知逆賊大股回竄自必添派鎮將星夜繞出賊前迎頭截擊惟恐下游因無船隻啟程需時伏求

皇上俯念江省危急情形飭令趕由陸路設法兼程進行以解城圍而資防守又奏准浙江撫臣黃宗漢飛咨以閩省漳泉延平會匪滋事屬臣將上年調撥來江之浙兵飭赴福建延平堵剿查前



調浙兵自春閒派守省城之章江門巡防稽查深資得力此時連得警報省門巡查較春閒愈爲嚴緊若再將浙兵撤調赴閩羣情必更搖動實於大局有礙所有該撫臣咨調赴閩之浙兵應令暫緩啟程再見在江路不通所有向榮大營糧餉應請旨飭令江蘇浙江兩省就近接濟上諭昨據張亮基奏賊船上駛沿途未聞殺掠擬持示曉諭分別良莠是否將見辦情形知會張芾兩省勦撫未可兩歧如果此股賊船半係前途解散難民急宜安撫遣歸本籍毋再驅而從賊見在江西見多船上竄頗覺驚惶並有退守省城添兵防守之說該署督商同張芾密加偵探相機妥辦爲要再已革湖南岳州營參將阿克東阿昨因楊以增奏在海州呈遞親供自首與伊子恩榮前報扶柩到京情節不符當有旨著正白旗都統開棺查驗茲據該都統等眼同該革員家屬開驗棺內但

有衣帽等物是該革員實未殉難兵丁李廷徵等之捏報陣亡情  
弊顯然著該督確切查訊具奏並迅將岳州水師目兵李廷徵並  
湖北中營目兵邱正清一併押解來京交刑部審辦該旗原摺並  
鈔給閱看將此由六百里諭令知之○安徽巡撫李嘉端奏臣接  
據按察使張印塘等稟稱初六日安慶之賊自集賢關退回陸續  
上竄初七日賊船僅畱百餘隻恐其勾結土匪竟行占踞當卽帶  
領兵勇鼓行前進賊眾紛紛登舟開逸止因兵力太單又無船隻  
不能追剿遂入城安民緝匪下游又有賊船數十隻由蕪湖上竄  
城門既皆破壞殘兵不能成軍不得已府縣暫行分駐城外該司  
仍回駐集賢關一面催提粵兵一面由練潭雇募民勇以資協守  
等情伏思賊情叵測實屬防不勝防見在李鴻章所帶之勇雖及  
千名惟裕溪口一片江灘不能紮營止可駐於運漕鎮經臣札飭

和州含山巢縣無爲各屬號召團練以助聲勢至安慶萬難駐守無論築室修城時與力皆屬不及即使縛茅作屋立柵成城而巷無居人誰與爲守應請恩施逾格准令張印塘等就目下情形擇要駐守總以防賊北竄不使與亳州一股聯合臣亦於十六日回郡城以備集賢裕溪兩路策應鳳定土匪見經李登洲黃元吉各帶義勇會同搜捕可期逐漸殲除鎮臣因潁亳一帶土匪騷動移兵潁州防勦其清流關一路已屬副都統雙成防守勿稍疏懈上諭軍中以偵探爲先所稱上竄賊船是否係金陵解散難民抑另有股匪在內如係解散之賊沿江覓食該地方官見其船隻較多驚惶逃散必致入城搶掠轉滋事端昨據張亮基奏先行持示曉諭分別良莠然後或加勦辦或加撫綏更易爲力該撫務宜多設偵探查詢明確斷不可賊至卽驚妄費兵力轉驅解散之眾又

成賊黨也安慶重遭蹂躪勢難駐守自係實在情形應如何擇要分兵扼守之處著該撫斟酌辦理至鳳毫一帶土匪尙多仍宜嚴行緝捕殲除淨盡勿令勾結爲患另片奏需餉甚急已有旨諭周天爵飭令王夢麟於徐州糧臺酌量支付惟各路籌餉孔殷該撫務當飭屬撙節動用仍須設法勸捐奏請鼓勵若專恃官帑恐後難爲濟矣將此由六百里諭令知之○諭張芾奏江西兵勇不敷防剿請飭各路大兵赴援一摺並浙兵不能調回大營糧餉請由江浙就近接濟等語前據該撫奏稱逆匪順風揚帆未必卽係回竄江西省九江鎮道稟請厚集兵勇未能熟計全局本日復奏稱逆匪乘風直上欲撲省垣究竟該匪船是否已至九江曾否與官兵接仗欲撲省垣之說係憑何處探報聲敘均未明晰江忠源前奏亦止稱賊船千餘隻於初七日至彭澤縣並未登岸搶掠昨據張

亮基等奏賊船上竄沿途各州縣未聞擄殺擬委員持示前往曉諭分別辦理諒已知會該撫儻該逆實係心懷叵測則九江不能飛渡該郡雖係蹂躪之餘亦當嚴飭該鎮道竭力守禦並令江忠源相機堵剿何得遽爲退守省城之計至向榮攻剿江甯鎮江各城正在緊要之際該撫欲令其統領重兵由陸路赴援江西省城豈不慮金陵大股賊匪又將縱之紛竄耶賊情變幻靡常卽遇緊急亦不可驚惶失措見在江西情形喫重該撫當與在籍尙書陳孚恩悉心妥籌將本省各路防兵移緩就急或就近咨商湖北撥兵接應所有江忠源所帶勁勇可以擇要扼截其入湖要口及吳城等處應如何防守惟當相機布置不可徒事張皇所畱浙江兵丁卽著照議辦理仍咨會浙江另籌調撥如此股賊船查係金陵解散難民安慶旣誤認真賊驚疑退避江西又毫無偵探辦法遽

棄九江不但自行擾亂又將驅之從賊此中機宜不可不慎而榮大營糧餉關繫全軍支用仍著妥爲接濟已有旨令向榮與該撫等咨商辦理矣將此由六百里諭知張芾並諭令陳孚恩知之○以直隸按察使恆福爲大理寺卿○命前任河東河道總督文冲赴直隸軍營交總督訥爾經額差委○西凌阿明慶烏凌額魁福奏臣等由蒙城亳州追至河南歸德賊匪均已竄去至五月十七日至杞縣探聞賊撲汴梁被官兵擊退十八日卯刻至陳畱縣托明阿善祿帶領官兵亦赴汴省剿賊臣等當經面商合兵進剿十八日巳刻至汴梁省城東門外紮營該省署布政使沈兆澐等均臣在城樓駐守防範嚴密告稱賊匪已由朱仙鎮竄至中牟縣境等伏思賊匪鬼蜮片性或實係勢窮欲由中牟縣南下過江遠遁抑或由省城西南繞至河口希冀北渡均未可定自應畱心偵探

相被防剿以期速爲殲滅得旨奮勉出力以贖前罪○托明阿善祿奏臣等於十三日督催官兵前進睢州一帶斬殺逆匪六十餘名擒獲長髮逆匪十餘名杞縣一帶斬殺四十餘名擒獲二十餘名內有偽監軍一名彭泳濤偽司馬一名何海芒均卽隨地正法並於十七日在陳畱縣境內搜斬二十餘名查該縣距汴城四十餘里大股逆匪已先於十三等日圍攻城垣幸該藩臬等極力防禦兼之後有追兵跟蹤進剿遂卽竄赴朱仙鎮及中牟縣地方僅賸零星逆匪分匿村落窺伺消息臣等於十八日趕至汴梁城下當有都統西凌阿等統帶黑龍江官兵一千數百名亦於是日抵省臣托明阿善祿緣梯上城面晤該司道等詳詢防守情形尙爲嚴密臣等立卽分撥馬步各隊督催啟程確探賊蹤相機擊剿務期趕緊殲除得旨並未與賊打仗賊已先竄斷非因畏兵到而逃

著趕緊追剿勿墮賊詭計勝者論功挫者罰罪無別言可諭也○  
戊辰諭內閣托明阿善祿西凌阿等奏馳抵汴城逆賊奔竄跟蹤  
追剿各一摺該逆由睢州直撲汴城先被守城將士用礮轟擊殲  
斃多名復聞大兵將至卽奔竄朱仙鎮及中牟縣地方見在托明  
阿善祿西凌阿等跟蹤追剿陸應穀經文岱計已由許州前進恩  
華勝保不日帶兵亦可抵汴會合攻剿該逆紛撲汴梁一經追剿  
卽行逃竄此時大兵雲集不難迅速殲除該將軍等務當分路兜  
拏毋稍遲緩致令蔓延西凌阿係獲罪之員應如何感激思奮儻  
能勉力自效尙可稍贖前愆如仍不知奮勉朕必當執法從事決  
不姑貸懷之○諭軍機大臣等本日據僧格林沁等奏請豫籌撫  
恤難民等語京師重地如有難民紛至人心必致驚惶自應隨時  
安撫俾不至流離失所而奸宄亦無從溷迹見在近京一帶辦理



巡防先以安民心爲要務直隸總督順天府尹於近畿各州縣及口外府廳州縣勒令官紳等量力捐輸米麥卽在各處豫爲儲積遇有難民逃至隨時散給口糧或遣令回籍或擇地安插自不至糜集京師別生事端也將此諭令知之○諭本日據哈芬奏河南陝州靈寶等處爲由豫赴陝山兩省大路黃河各渡在在毗連此二處如能得人帶兵鎮守則山陝可保無虞等語著舒興阿張祥河卽派延綏鎮總兵金萬全酌帶精兵迅速前往陝州靈寶縣等處擇要堵截以杜賊匪紛竄之路將此由四百里諭令知之○御前大臣僧格林沁等會議京師巡防章程十二條一查獲奸匪以軍法從事容畱者同罪獲犯弁兵升賞一住戶鋪戶五家互保不得容畱匪人一飭地方官驅逐娼賭一嚴緝私造火器火藥加等治罪一夜犯加重懲治一起更後不准售賣物件一嚴禁酗酒滋

事一無賴之徒訛詐搶奪照棍徒律發遣一平人鬪毆加等科罪  
弁兵參革一嚴禁米石出城一仕宦官民不得無故遷徙一謠言  
惑眾嚴拏治罪從之○己巳沈兆灃林揚祖奏臣等自十六日後  
探報賊分兩股行走一向西北一向西南查西北係由祥符赴中  
牟驛路尤關緊要臣等隨精選兵勇十七日縋城分往衝僻各要  
道奮力截殺共斃賊四十餘名生擒二十二名十八十九等日復  
生擒五十二名殺斃四十二名連日研訊生擒之賊據供自揚州  
逃出不過千人沿路裹脅至汴梁若萬餘人亦有稱兩萬人者但  
隨裏隨散見贖五六千人因懼城上大礮不敢逼近城垣分起赴  
朱仙鎮屯住時將軍托明阿提督善祿都統西凌阿等統帶官兵  
均馳抵城下托明阿善祿緣梯上城臣等謁見詢悉賊匪竄至中  
牟僅贖零星逆匪分匿村落卽分撥馬步各隊督催啟程趕緊進

勦撫臣見抵許州不日即可回省臣等惟有會同文武員弁督率紳士兵勇倍加嚴密防守不敢稍形鬆懈又奏賊匪隱匿附近村莊署祥符縣知縣何懷珍親督役勇縋城而下赴鄉窮搜在東鄉馬頭村斬長髮賊四名生擒十四名又在東南鄉蘇村莊及南鄉茶庵擒斬多名並搜獲偽官冊二本詳記各賊年歲里居其生擒各賊均卽審明正法署知縣何懷珍奮勇殺賊不避危險臣等謹將該令及守城出力員弁隨時存記候撫臣回省再行據實覈奏上諭內閣據沈兆雲林揚祖奏稱署祥符縣知縣何懷珍雇勇守城復親督役勇縋城赴鄉窮搜賊匪斬擒多名該縣不避危險奮力殺賊洵不愧守土之官何懷珍著先行賞加同知銜仍著陸應穀督同沈兆雲等查明與守城出力之文武員弁兵勇及紳民人等一併奏請獎勵候朕施恩其歸德等處失守各員著陸應穀

等查明該員等如係畏賊退避並未守禦以致失守城池著卽一面奏聞一面以軍法從事逆匪分竄本多裹脅烏合之眾該地方文武如果督率官兵紳民嬰城固守以待大兵何至遽爾失陷總由該員等畏死倖生先期逃避致令賊匪肆行無忌各省督撫大吏責任封疆遇有此等貽誤劣員卽當從嚴懲辦如意存徇庇或巧爲開脫經朕查知必將該督撫等從重治罪決不寬貸○諭軍機大臣等寄諭河南巡撫陸應穀等沈兆澐林揚祖奏連日緹城殺賊見已西竄等情一摺自本月十六日以後賊分兩股一向西北一向西南經沈兆澐等選派兵勇分路截殺先後擒斃不少並生擒賊目僞官數名奪獲器械多件該紳民兵勇等奮勉出力甚屬可嘉著卽隨時查明據實保奏候朕施恩惟訊據生擒之賊供稱自揚州逃出不過千人沿路裹脅至汴梁約萬餘人隨裹隨散

見贖五六千人到處號稱數萬及一二十萬恐嚇鄉愚到汴後因懼城上大礮不敢逼近分赴朱仙鎮屯住擬分路裹得人多再來圍攻各等情是賊匪爲數並不甚多卽所稱見贖五六千人亦多係裹脅之眾若能趁此奔竄未定之時各路官兵迅速併力追剿使賊無暇喘息定可一鼓殲除若但憑傳聞虛嚇之詞驚惶無措守土文武聞警先避而封疆大吏一戰兵潰之後退居遠地毫無策應任賊從容裹脅或竄山陝或渡河擾及近畿遷延貽誤自問當得何罪中牟偪臨黃河爲北來要道若北竄懷衛一帶則蔓延更不可問朱仙鎮爲該省繁要之區人煙輻輳若賊搶掠飽颺其勢又將復振該撫爲守土大吏地方被賊蹂躪至此若不及早剿滅稍贖前愆不惟無以對朕又何以對中州數萬生靈耶托明阿西凌阿等均已到汴經文岱亦自許州啟程前進該撫續調之兵

見到若干著卽督率將弁探明賊蹤與托明阿等會商分路兜剿或迎擊於前或追剿於後或設法旁鈔使賊進無所掠退無所據自不難聚而殲旃仍當嚴飭沿河州縣將船隻收盡嚴密巡防絕其渡黃之路並通行各屬曉諭紳民實力團練互相保衛一遇賊匪竄至卽行合力擒殺毋任遠逸沈兆澧林揚祖等仍須督率城內文武兵勇紳民固守嚴防毋因擊賊屢勝稍涉大意將此由六百里諭令知之○諭本日據沈兆澧等奏汴梁城外賊匪見已西竄等語前已疊降諭旨令舒興阿等於山陝與河南交界地方派員擇要堵截諒已遵照辦理矣此股賊匪本屬烏合之眾如地方各官皆如署祥符縣知縣何懷珍督率役勇縋城而下赴鄉殺賊何至該匪肆行無忌若如歸德等處文武一聞有警輒然退避卽有援兵亦何能久陝西山西與河南毗連要隘關津必須嚴密防

守所有扼要之州縣各官務卽揀選才能出眾素爲百姓愛戴之員酌量調派其不得力之員卽行甄汰免致貽誤並曉諭紳士商民實力團練盤緝奸細並嚴防黃河口岸將船隻概行收藏萬不可任賊偷渡稍有疏虞將此由六百里各諭令知之○辛未諭軍機大臣等本日據許乃普奏賊蹤偏近地方請將監獄重犯先行正法等語逆匪竄擾地方開獄縱囚勾結死黨是其慣技是先決重囚亦豫除逆黨之一策著陸應穀督同臬司查明距賊較近各府州縣在監人犯如實係強搶重犯及火器殺人在獄待決者卽著酌量緩急一面奏聞一面先行正法毋稍拘泥其案犯較輕罪不至死者應如何妥爲設法密加防範之處亦著嚴飭各屬妥速籌辦以免勾結將此由五百里諭令知之○諭徐澤醇奏廣籌經費請飭各直省將社倉穀石分成提解或充軍餉或變價備撥並

借用濟倉之糧爲本省防堵之用等語著各該督撫按照摺內所  
陳各就地方體察情形斟酌妥辦原摺著鈔給閱看將此各諭令  
知之○周天爵奕經奏五月十七日臣周天爵由碭山折回徐州  
十九日臣奕經亦遵旨馳到會剿臣等公同相度機宜於南岸十  
八里屯減水牐與北岸蘇家山頭斜對紮營又豫備架礮大船三  
十隻草船一百隻分貼兩岸灣泊埋伏一遇賊船東駛卽督飭水  
陸三路兵勇迎頭截擊惟徐州驛站南接江甯浦口見在沿江賊  
船上竄絡繹不絕如再登岸續來更難抵禦臣等再四籌畫惟十  
八里屯牐下通洪澤湖宿州迤北之符離濉河一片汪洋僅有山  
路一道可通以千兵守之則南來之賊可以截擊臣等當飭河員  
卽將此牐啟放則南路庶保無虞至符離迤南二十里之宿州係  
赴汴梁驛站亦應重防但此時布置自當以徐州爲要臣奕經所



帶之兵四百餘名應請畱於徐州扼要會截尙可得力 上諭徐州重地自宜扼要設防經該侍郎等會勘徐州上游十八里屯減水牆與北岸蘇家山頭斜對可以紮營並豫備架大礮大船三十隻草船一百隻分貼兩岸埋伏啟放牆水以截南竄之賊宿州亦經酌量布置著卽妥速辦理一遇南來賊匪卽督飭水陸兵勇截擊毋令竄逸如擾豫之賊沿河下竄亦著就近截剿奕經所帶之兵四百餘名准其畱於徐州會同周天爵體察情形相機防剿並嚴防土匪勾結儻有疏虞朕惟周天爵奕經是問○周天爵奏陳折回徐州原委得旨軍營必有探報何得信若是之遲可見偵探不實著著落後○鑄當十大錢○壬申江西巡撫張芾奏臬司江忠源於五月十六日自九江陸路來省探聞賊船已入湖口乘風直上吳城水面亦寬江忠源兵力又寡卽能保護該處地方斷不

能阻賊來省之路權其輕重緩急仍當在省協同守禦見在臣陳  
孚恩率同江西臬司惲光宸前任山東臬司徐思莊等帶領官紳  
三局練勇一千八百餘名並浙江處州營遊擊常海帶兵數百名  
於城北得勝門外分立營壘互爲犄角以備迎擊臣與江忠源及  
地方文武官紳督帶兵勇丁壯登陴固守江忠源仍隨時出城策  
應所調九江南贛兩鎮兵陸續可到惟江西兵力本弱未經臨陣  
所恃者惟江忠源一旅殊覺單薄應請飭下向榮及湖廣督撫迅  
卽撥兵救援不特保護江西兼可將此股分竄之賊先行撲滅實  
於東南大局有益江忠源奏臣疊奉江西撫臣等札飭臣進省堵  
禦臣思江省糧臺根本重地較之九江殘破之區輕重懸殊卽日  
帶勇兼程進省與撫臣等妥籌守禦務期計出萬全以紓聖主  
南顧之憂惟臣所帶楚勇及江省原調兵勇不滿五千戰守尙形

單薄相應請旨飭下向榮於大營中迅撥精兵二三千名交得力鎮將如和春秦定三等管帶迅速由陸路趕緊前來以資應援上諭軍機大臣等此項船隻自停泊彭澤已將旬日該臬司駐紮九江府城相距咫尺自必確有見聞此次奏報情形僅有賊船已入湖口一語究竟賊船於何時入湖沿江一帶有無失事九江是否安堵船上人等曾否抗拒官兵搶掠地方該臬司及張芾摺內均未詳細聲敘朕心實深懸繫如果此項船隻實係逆匪分股自應亟籌剿滅但恐其中多係難民下游旣已免死遣散而該省復加以截擊豈不激成事端又勞兵力且卽以真賊而論連艘千計人數眾多亦豈株守南昌所能了事該撫等務當偵探明確統籌全局毋誤事機張亮基前奏辦理情形甚合機宜該撫仍當趕緊會商分別應剿及應行遣散之處妥籌速辦一面會同陳孚恩督

同江忠源嚴密布置固不可自相擾亂徒事驚惶亦不可恃爲無虞稍存大意向榮軍營官兵能否抽撥尙難豫定本日已諭令酌量調派卽著該撫飛咨商辦將此由六百里加緊各諭令知之○諭寄諭欽差大臣向榮幫辦軍務許乃釗據張芾奏賊蹤逼近江省已調回湖北臬司江忠源至省協防並請飭向榮添兵赴援等語此股賊船沿途有無搶掠其竄至彭澤是否與官兵接仗均未經該撫詳細聲敘前降旨令查明向繼雄追賊退入九江一節尙未據該大臣覆奏張亮基前奏又有刊刻告示委員持往各船散遣之說究竟此股賊船是否均係眞賊意在直撲南昌牽掣江南大軍據張芾疊次奏報情形緊急著該大臣確探賊情酌量撥兵援應如實係遣散匪黨應如何設法彈壓解散亦卽飛咨張亮基與張芾妥籌辦理金陵鎮江兩城日久尙未克復而賊船紛紛上

竄致令鄰省告警請兵勢將掣動大局不知該大臣等見在如何籌畫紓朕南顧之憂耶前有旨令瞿騰龍帶兵赴山東河南一帶此時諒已啟程卽著催令北上毋稍遲誤將此由六百里加緊諭令知之○河南巡撫陸應穀奏

臣

先於十八日咨曾經文岱帶兵

一千六百餘名由朱仙鎮進剿二十日南陽鎮

臣

柏山帶領弁兵

四百餘名並所調襄城等營官兵先後趕到

臣

於二十一日會同

前進旋據探報賊由中牟鄭州竄至汜水該處文武督同紳民先將虎牢關老犍坡要路挑斷不能飛越見奔汜水山內村莊搶掠

臣

查該逆西竄無路勢必折回恐由密縣山徑竄出必須分路進

兵堵截托明阿善祿業經自省啟程

臣

卽函令由中牟鄭州進剿

一面卽將襄城等營弁兵均交柏山帶領調回經文岱會同柏山由新鄭趕赴密縣堵截惟密縣西路係與登封接壤可以繞至洛

陽該處並無重兵深爲可慮蒙恩調派陝甘督臣舒興阿帶兵來

豫救援相應懇懇飭催迅速前進得保洛陽卽可以衛山陝臣隨

身所帶兵勇僅有三百餘名而省城擒獲賊匪供有裹得人多再

來圍攻之語不可不防見在先赴省垣料理守禦事宜仍俟催取

北鎮官兵一千名並甯夏馬隊到日察看省城安靜臣卽行統帶

前進策應會剿斷不敢稍圖安逸 上諭逆匪紛撲汴城雖被擊

敗而夥黨紛竄沿途裹脅若不趕緊追剿致令肆行搶掠更恐滋

蔓難圖見在托明阿善祿西凌阿等先後督兵抵汴疊經嚴諭併

力勦賊何以未據續報與賊接仗情形陸應穀係封疆大吏若不

及早將該逆匪撲滅但株守省垣以剿匪委之客兵儻有疏虞豈

能置該撫於不問陸應穀著仍遵前旨督兵出省乘該匪喘息未

定會同托明阿善祿西凌阿經文岱柏山等迅速進剿總須探明

賊蹤專力攻擊令其無暇搶掠則被脅之眾日散賊勢益孤自可一鼓殲滅若徒分兵於遠處堵截賊來不擊賊去不追又蹈從前覆轍統兵大員及該撫豈能當此重罪耶近來軍營惡習病在遲緩以致屢失事機若此股賊匪河南不能撲滅又令竄擾鄰省朕惟知執法從事決不妨寬省垣防守仍責成沈兆澐林揚祖督同所屬勸諭紳民嚴密巡查不可稍有疏懈其近賊各州縣卽飭令該地方官與紳民人等一律嚴防查拏奸細儻賊匪竄至卽行合力擒殺毋畱餘孽前已疊降諭旨令舒興阿派員出關援應該撫仍宜隨時知照山陝兩省一體防範勿稍疏虞本日光祿寺少卿黃兆麟奏守城事宜十二條可否仿照辦理著採擇施行原摺著鈔給閱看將此由六百里加緊各諭令知之○工部奏製造各項礮車請派大臣承修得旨各旗應修礮車是何等緊要事乃爾部

仍行照例緩辦不過聽司官之言何事應奏則唯唯是聽要如是堂官何爲也嗣後遇有此等事著將原咨奏准之日俱詳細註明勿稍含混○以江廣土匪竄陷湖南桂東縣城革知縣范鑫千總吳廷雄職○賞南苑察哈爾官兵每日銀兩並月米有差○癸酉少詹事王履謙奏臣疊據懷慶府知府余炳燾等稟稱南岸汜水縣有東來賊匪數千人闖入縣城焚掠幸南岸已無船隻驟難北渡嗣又探得賊匪西往鞏縣一帶搶奪洛河船隻意圖由洛入黃再行北渡兵單賊眾河岸遙長請卽調兵堵禦等情臣查洛河在黃河之南係洛陽偃師鞏縣三縣所轄之地本未設有渡口乃忽聞由此搶船入黃意圖北竄自必有本地奸匪勾結實出意料之外卽札調柳園等口防兵就近迅往溫孟二口協力守禦因思省城兵勇不下萬餘賊匪由西而來距省已遠溫孟二口情形危急



應卽咨商撫臣速派弁兵北渡往援至山西直隸俱與河南北岸毗連亦卽飛咨於各要口設兵防堵撫臣陸應穀未知移紮何處河臣長臻至今未到刑部員外郎邵懿辰仍在山東劉家口河北道蔣啟敷在省守禦北岸別無駐守大員臣萬分焦灼惟有恪遵諭旨分飭沿河地方文武嚴密巡防隨時截擊並飛催就近官兵往援斷不敢以責止稽查稍涉鬆懈上諭軍機大臣等黃河南北兩岸最關緊要屢次諭令該河督實力巡防何以至今尙在濟甯殊屬不知緩急長臻身任河督防守河岸是其專責儻任賊乘閒偷渡自問當得何罪陸應穀馳回汴梁已令其帶兵出省剿賊正在喫緊之時王履謙長臻察看情形緩急應如何就近調派卽行相機辦理本日已有旨令訥爾經額飭令帶兵大員趕赴黃河北岸扼要堵剿卽著長臻督帶河標官兵探明賊蹤嚴密堵截並

隨時知照河南各路統兵大員迅速追剿及直隸帶兵鎮將一體嚴防萬不可稍有疏虞將此由六百里各諭令知之○向榮許乃釗奏臣等接奉諭旨飭令瞿騰龍酌帶兵勇馳往河南山東一帶攻剿伏思該逆以旁竄分我之力以負固老我之師以久踞糜我之餉恐大兵稍一那移則東南半壁更難支持茲謹遵旨飭令瞿騰龍統帶陝甘精兵一千八百名湖南精兵二百名於本月二十二日由紫金山大營分起啟行取道丹徒渡江賊蹤竄擾隨時變遷已飭令瞿騰龍於渡黃時與河臣楊以增山東撫臣李德勳商確探賊蹤所向以何處爲急卽往馳救臣向榮克復無方未能遏賊北竄上煩 聖慮應請旨交部從重治罪以爲討賊不力者戒至金陵省城自本月初八日初十日兩次破賊營之後該逆益加嚴備乘我兵不能在彼駐紮復將已毀營盤連夜修整依城踞守

臣逐日飭令出隊誘敵一面飭翼長等躡覓隱避處所暗窺地道密爲布置惟自本月十四日至今陰雨未晴不勝焦急惟有激勵將士先行攻克金陵卽當相機分兵北上總期殄此羣醜庶可稍紓宸念用贖臣愆得旨汝所請治罪亦係汝之取巧故智勿謂朕不能看出續有廷寄內殊諭皆是誅心之論不知汝知徹否總之若能迅克金陵則汝功最大前罪都無若仍喫緊時巧爲嘗試則汝之罪難寬朕必殺汝懷之又奏丹陽紳董擊沈賊船並搜獲逆書批該逆詭計多端不可不防丹陽紳董奮勇可嘉○是月貸湖南鳳凰等五廳縣屯丁口糧